


# AN·CHENGGOPGRE SONGNI PANTE

(A·CHIK NOVEL)




**WILNEN B. MARAK**



**GARO NOVEL**

**AN·CHENGGOPGRE SONGNI**

**PANTE**



**"MANDENI JANGGI TANGANIO CHU·SOKANI BA  
CHU·SOKGITANI A·SELARA PANGNAN  
AN·TANGTANGON ONG·AI!"**

**BY**  
**WILNEN B. MARAK**

**AN·CHENGGOPGRE SONGNI PANTE - *a garo***  
***novel written and published by Wilnen B. Marak.***

**1st Edition : 2009**

**Price : Rs. 45/-**

**Published by : Wilnen B. Marak**

**D.T.P. Composed : Johnson D. Marak**

**Printed at : SIMSANG TECHNOLOGIES**  
**Williamnagar, Soil Bazaar**  
**Hello: 9856091876, 9863416136**

*Special thanks  
to the  
Director  
and  
his Staff,  
Art & Culture,  
Govt. of Meghalaya, Shillong  
for  
their financial support  
for the second time.*

---

---

## SENOKGIPANI GIMIN

---

---

Shri Wilnen B. Marak Late Nelson A. Sangma aro Late Tolmony B. Marakni depante ong•a. Ua Ganolgre songo atchie Primary skulkode songtongon poraienba, Middleko Rongramo poraiaha. Middle matchote High Skullo poraina Tura Govt. Boys' Skulona re•angaha aro 1982 bilsio Matricko pass ka•paaaha. Matric pass ka•ani ja•mano ma•a-paa dakchakna chol ong•jahani gimin, Williamnagarona re•bae kam sandion, Industry Departmento Nokgipani ka•sachi chona rema kamko 1986 bilsio manpaaha.

Chona-remam kamko kae roengon 1990 bilsio an•tangna jora ripengna, Tura Baladingni Shri Henry R. Marak aro Smt. Wederline D. Shira-ni skanggipa de•mechik, Smt. Notilla D. Shira-ko bia ka•aha. Da•o uamangna Nokgipa Isol depante sakgittam aro demechik saksako patiaha. Ua Kusimkolgre, East Garo Hills, Williamnagarona an•tangni nokdangko dake dongengon, antangni poraianiko chu•ongnikjae, bi•sa-desa chochonengmitingon kolejo naptaeinba 2003 bilsio B.A. ko pass ka•paaaha. □

## **AGANCHENGANI**

Ia A·chik Novel "ANCHENGGOPGRE SONGNI PANTE" ingipa ki·tapara angni gnigipa nakatatenggipa ong·a. Skanggipa ki·tapara, "KATTA JIKSE BA KU·JIKSERANG ARO POEDORANG" ingipako 2006 bilsini August 6 tariko nakatatchengaha. Ua Ki·tapko bree poraigipa sakantiko anga mitelbea maina poraigiparang dongjagenchimode ki·tapko segiparang segramaigenchim aro ki·tap segiparang dongjagenchimode an·chingara maiko poraigenchim. Ia Novel·ko seengon anga darangni janggi tanganiko miksonge sea ong·ja, indiba ian an·ching A·chikrangni janggi tanganirango maikai ong·achim aro saniba janggi tangganirangara sanabade skidopani gita ong·a uaranko, chadamberangna aro ma·a·paaskarangna skidapani gita ong·gen ine nike gisiktango chanchichipgipa golpokosan seaha. Minggipin an·ching A·chikrangni da·ororo bia ka·anirango bang·a korosrangko galesa dedrang sakantiko bia ka·e on·anio kangal ong·dapatania ra·baroroenga ine nike, jatni dakrongbaenggipa ong·genchimoba an·tangni namnikgijaniko parakna ine ia ki·tapko seanio, golpoo nangchapataha. Da·ororo an·chingni ia bia ka·atanirango pilak dakanirangara jatni dakbewalman·cha ine aganade ma·ja, maina skangni ma·gitcham·pagitchamrang do·si -do·dokani somoide indakgipa korosrangko gale dakanirang dongjachim. Haida ian an·chingni Kristian ong·ani ja·mao gipin a·songni man·e chagipa jatrangni dakanirangko ja·rikesa dakbaenga gita angade chanchiman·enga. Iako dakanio haida nokdang choligiparagnade neng·ani dongjanaba gnang, indidba cholipagijagipanade ian namen

biljimoni ong·chongmotenga; maina changsa bia  
ka·ate gro nanggiminko chotnaan chasonggimikba  
matchotjaengode, maikai gipin demechikko bia ka·e  
on·taikugen. Uani a·selan bang·a dedrangrangan bia  
ka·ataniko man·gijaan jikdong-sedongna nangengjok.  
Unigimin hai A·chik skia man·giparang aro gisik  
matgrikrang■■■■gara, jatni neng·nikengoba gelna  
man·jae chilenggipa balko ritchengatna chanchina  
a·bachengna ingipa chanchianiosa ia golpoo bia  
ka·ani bewalko jegalagita seaha. Indiba ian jatni  
bewal dakangaekuna ine donangkuaioaba jatni  
namnikanisan ong·aigen aro angni iako seanio jatni  
bewalko jegalenga ine saoba chanchiode angko kema  
ka·chinaba mol·molenga. Jatni bewalko jegalna ine  
miksongede sejaenga indiba ku·monganichi  
dingtangatna man·genchimode jat gimiknan namgni  
ong·gen ine anga an·tangde nikenga.

Minggipin anga ia golpoo dingtangdingtang  
manderangni bimingrangkoba done jakalaha,  
uarango saniba bimingrang apsan ong·genchimode  
uan apsangakasan ong·aigen. Una agreba ia ki·tapo  
songrangni bimingrangkoba chanchichipe  
dongiminsan ong·aia, banoba apsangemchim ong·ode  
urangba apsangakasan ong·aigen aro uarangna  
kemako bi·enga. Ia angni gnigipa kitapko bree  
poraigipa sakantiko mitela, seanio banoba  
namdatpatna nanganirang dongode seachi ba ka·mao  
on·enggipa contact no·ona uitade mitelbegen.

Senokgipa,  
Wilnen B. Marak  
Kusimkolgre.  
Contact No. 9436330743



# NING OGIPARANG

## Katta Eichonrang

### BAK - 1

An chengnggre sengu Kallepni  
Janggi Tunganrang.

### BAK - 2

Kallep Primary Skuliko matcheta  
Turachi Poraina Re-anga.

### BAK - 3

Kallep poraimitingo an-tangko aro  
ma-gipani nokdangko nina nangano  
sorkarini kamko am-e ka-a.

### BAK - 4

Kallep nogipana sorkario kam sandie  
on-a aro an-tangna jora-ripengko  
basen.

### BAK - 5

Me-jakpa gritang-sokchiko  
man-baengani gimn ma-chi-nochi  
sing-e-sana nina re-angheaga.

### BAK - 6

Kallepko bis ka-na tarisanrang.

### BAK - 7

Kallepko bis ka-a aro uni nokdang-  
ba-ku daka.

## Jakrang

1-3

4-13

14-30

30-38

38-41

41-57

58-67



## BAK - 1

An·chenggopgre songo Kallepni Janggi Tanganirang.

A·chik songni bijatchio song damsa dongachim, jekon An·chenggopgre Song ine minga. Songo pante-me·trarang aro cha·na·ringna dongkalgiparng bang·ani gimin, rona roansengachim aro dongna dongansengachim. Ua songara chibimani rikamo ong·ani gimin a·rakode rona an·sengbeachim jeni gimin, gipin gipin biaprangoni pante-me·trarang piknik cha·na, au-miksue rona aro naotok-angke am·e rona re·barongachim. Ia songo skia man·kalgipa me·apa me·chikmarang aro pante-me·trarang dongkalani gimin, Kristmas ba gipin gipin maniani salrangoba rona namen an·sengbeachim. Songni segpangjolo donggipa gipin songrangode skia man·kalgipa manderang dongjachim, indiba banoba saksa banoba sakgni dake poraikal·e jik-se ra·e donggiparangde dongpaachim. An·chenggopgre songni manderang bang·batan skia man·kalgiparang aro cha·na ringna dongkalgiparang ong·ani gimin detangtangkode Tura ba Shillongosa poraiatokengachim. Unigim songo-noko pante-me·tra bang·genchim ong·oba bilsimitingode bang·gija pante-me·trarangkosan nikna man·aiachim, indiba songsulni pante-me·trarang re·bae poraitokengachim, maina ua somoiode gipin sepanggipa songrangode primary skul dongjachim.

Songtangni bi·sarangni giseponi Kallepba ua skulloan poraipana gita nangaha, maina ua kangalni bi·sa ong·an baksa pagrisa ong·paani gimin gipinchi poraina gita chol ong·pajaha. Ia skulo skigiparang sakgittam donga aro uamangoni me·chik skigipa saksa aro me·asa sakgni ong·achim. Ia skulko

namsranga ine aganaba deda, aro namjasranga ine aganaba jaja dakachim; maina bilsiantian gnigipa ba gittamgipa gadangrangode Boardni porikkao pass ka·rongachim. Skigiparangni gisepo saksade klas ka·an tik ong·jabeachim, indiba sakgni skigiparangde gisik nange ka·rongachim. Indake mitamrangni gisik nange skul ka·gijanirangko songni manderangoni mitu mitu agananirangko skulni secretary knaenba, chanchianiko dakna nanggen ine nirokgipa komitirangko okame tom·dakataha. Tom·ani padot biapko ra·e, tom·bagiparangko rimchaksoani kattarangko agane, skigiparangna indake ku·pattiaha, “Na·simang skulko gisik nange ka·tokbo, jedakode ia an·chingni skulba niksenggiparangoni ge·sa ong·pana man·gen”. Unon skigiparangoni saksa jean, klas ra·a tik ong·jabeengachim; an·tangkon aganengagita chanchie chakate aganatskaaha, “ Angaba gipinranggitan bimchipe ka·pana skachim, indiba ia angni ok aro angni nokdangni manderangni cha·asianian skulchi re·bagnikoba champengenga; maina dormahakoba jagittam ba jabrini ja·manosa man·aiode maikae janggi tanggen., unigimn janggi tangna gipin kamrangko sandie ka·na nanganio skulchide re·bana man·skaja. Anga na·simangko aganpilna mamung kraani dongjaoba angade indake agan-na sikengachim, je skigiparangni dormaharangko maidakode jaantion man·a amgen una kam ka·china an·chingni dilgiparangko na·simang skulni komitirang mol·mole nitokbo, mikkangchide angaba gigpinrang gita bimchipe ka·pagnok” ine agane an·tangni agananiko dontongaha. Komitirangoni saksa aganskaaha, “Beben, ia skigiparangko sason ka·na gita an·chingo chu·gimik bil dongja, maina sorkarisa uamangna dormahako on·enga aro je on·paaba tikan ong·ja

da·nang. Indimangba angade skigiparangko mol·molna sikkuenga, ang·ching sorkariko ka·anange dongaiode an·chingni dʔedrang-su·drangsa bon·chiptokaigen, unigimin je chol dakeba bi·sarangko skul ka·anikode gisik nange daktokpʔaode nambegen. An·chingni dedrangko dal·at·chuatanide skanggipa nokdango ma·a·paani kam aro gnigipao skulo skigiparangni kam ong·skaa, maina nʔsimang skigiparang dormahani giminsaan chanchie ka·aiode indide sawasa an·chingni dedrangna ramako mesokatgen? Anga bebe ra·a, skigiparangba ka·anangani giminsa aganenga, maina ka·anango maiko inja, okrio maiko cha·ja, ine me·aparangde agana. Unigimin skigipani agangimin gita, biaba gisik pil·e gipinranggitan gisik nange ka·pagnok ine aganengani gimin, an·ching bikoba kema ka·na nanga” ine namprete aganangaha. Darangba agangnigipa dongjahani gimin, tom·ani padotchi agane, tom·aniko dontongangaha. □

## **BAK - 2**

### **KALLEP PRIMARY-KO MATCHOTE TURACHI PORAINA RE·ANGA:**

Songni primary skulo poraienba, boardni porikako semane resultna sengtokengachim. Uamangni gisepo Kallepba saksa ong·paa aro uade klas chonaonin an·tangni klasko aman baksanaba bilsiantian skul gimik gimikkoan ambarongengani gimin, uamangni boardni (klas III) porikkako seanioba skanggipa gadangoan pass ka·aigen ine skigiparang aro songni manderangba ka·dongsotokengachim. Adita ja ba salrangni ja·mano porikka knaahaon Kallepde skanggipa gadangon

pass ka·bebeahana ine songgimikan jangtokaha aro uni ma·gipaba knaenba kusi ong·an baksa gisikko chanchie dukko man·pil·engachim. Maina uni degipa lekka man·pagipa ong·genchimoba, poraiangkuna gita sawa uko dakchakgen aro pagipa sagi dongkugenchim ong·ode, depanteni chu·sokaniko nike baditan kusi ong·pagenchim ine chanchienba bate gisiko duk ong·beengachim. Depantegipa porika result ra·enba Turachini re·bapile, noksamona sokahaon ma·gipako ama, ama, ine okamaton, ma·gipa mikchi jingjang jingjang dake nokningoni ong·katbaako nike Kallep deldik dakaha aro ma·gipao sing·aha. “Mai, ama noko maiba ong·chimama?” “Ong·ja baba, nang·ni porikkako knasoesa gisiko kusi ong·e grapman·pilenga, ian kusini mikchisaba, jajrengna nangiawa ine ma·gipa aganchakaha.

Porikka knaani ja·mano Kallep Turachi gipinni noko dongnape poraina re·angna ine ma·gipao bi·on, watatna sikjagenchim ong·oba uni poraianiko dontongatna sikjae re·angchina watataha. Dongnape poraina ine re·angon Kallep mipal nokgipako altuaen man·aha aro skulkoba Tura Govt. M.P. skuloan altuae man·aha. Ua primarykosan matchotaigenchim ong·oba, songdamni bi·sa ong·pae adita bilsokaha aro je kamko ka·naba songo kam ka·e cha·gipa ong·ani gimin changaiachim. Kallep inditan kakketgipa aro je kamnaba bimchipgipa ong·ani gimin uni mipal nokgipa namen namnikachim. Uamangni indake namnikani giminan basakobade demechikgipa Me·katchian mikbupilrongachim. Kallepni mipal nokgipani nokdangba namen tom·tomgipa nokdang ong·achim, maina uamang Isolo pangchake janggitanggiparang ong·achim, indiba demechikgipa Me·katchide ma·a-paaoni dingtange janggitangna jotton ka·rongachim. Kallep skulchi re·na skang

nokni kamrangko pangnan matchote donangronga aro sokbapileba nokgipani ge·eta grian kamrangko sandie ka·gipa ong·ani gimin ge·etnan nangrongjachim. Ua Isolko ma·sikujagenchim ong·oba, chonaonin namgipa bi·sa ong·ani gimin je kamkoba gisik nangen dakrongaiachim. Uni nok nokgipa skulna pilak nanganiragkode dake on·tokaha, indiba leka·ki·taprangkode chu·onga gita bree on·a man·kujachim aro uarangkode chutini somoio songchi re·ange gamnap-rimnape man·achi breskagen ine Kallep chanchiengachim. Turani bi·sarang baksa poraigenchim oba, Kallep aditan lekka man·gipa ong·ani gimin basakoba gittamgipa, basakoba brigipa dakede bilsiantian man·rongaha.

Kallep pangnan jadokni porikka matchote songtangchi re·na man·rongaiachim, maina uni nokgipa chutini somoirangode re·na champenganirang dongjaha. Chutini somoirango songona re·baon indin somoiko re·atgija, salode pangnan ma·gipa baksa gipinrangchi gamnap-rim·nape cha·na re·angpaaha aro an·tangni man·paaonikon mitamko lekka·ki·tap brena chimongaha aro mitamko cha·a ring·anina ma·gipana on·paaha. Brena man·gijagipa lekkarangonikode ua pangnan gipinrangoniko walo walo gatskaa, maina salode kamrang ka·na nangani gimin jakchakjaha, aro waloba lemosa poraina aro seena nang·aha, maina ua somoiode bijolirang songadamode dongkujachim. Chutti bon·a skangan ua pangnan songoni re·angpilrongaha aro sokangpile uni nokgipanaba chutimitingon man·a kamrangko dakchakrongachim. Songoni re·angpile an·tangni chimongangimin adita tangkarangchi naggipa lekka·ki·taprangko breaha aro indaken bilsiantian porikkkarango namen chu·sokbana man·aha. Ua

poraina aro kamrangnasan gisik nanngaigipa ong·jaha indiba uni nokgipani attamanti nokdangni bi·anio dongpae Isolko ma·sina gita cholko man·aha aro indaken uni klas 8-o poraimitingonin Isolo pangchake janggi tangbaaha. Uni klas 8-o poraimitingo, nogipa Misalchide klas 5-san ong·kuengachim aro uade songadamosa poraiengachim, indiba uade poraina gisik nangana bate an·tangko tarinasa somoiko ra·batenba bilsiantian neng·e-dike ba alamalasa pass ka·baengachim. Misalchi adita daknanggipa ong·an baksa, an·tangko tarinasa tarina dakani giminan ma·gipa pangnan manengarongachim. Uaba gisiko nange poraigenchim ong·ode chu·soknade man·pagenchim ine ma·gipa aro adatang namen uiachim, indiba uni cholonan uko salonriknasienga ineba uamang namen uiskaachim. Beanbebe, Misalchi ua bilsion an·tangna jora-ripengko ra·na miksonge, Jorang minggipako nokona rimbaaha, maina ua an·tangan jakrara ong·jahachim. Jorang skia-poraia dongjagenchimoba chonaonin re·jojo rojojo dake janggi tanggipa ong·ani gimin rori ku·sikkode babret bala gita raprapataiachim, jeni giminan manderang uko maiba dal·a bading-chiwalani kamrangko dakengakon ine chanchiman·piltokengachim aro indaken Misalchikoba rope man·aha ine songni manderang agantokaha. Da·o uamangko ekgrikatnaba namjaha ine uienba, mama-ada aro barima-sokchaako okamattoke sing·e-sanne on·enba, A·chikni bewal gita do·si-dodoke on·aha, maina ua somoiode Kallep ma·gipamangara songsarek ong·kuengachim.

Bia ka·ani e·cham ran·kujaon, Misalchi-ma·angni nokdangara so·so-jeng·jeng ong·na a·bachengaha, maina Jorangara inditan ringrakgipa,



joa kal·rakgipa, nokdang·ba·kuna simsakgijagipa aro jikko·deko dokrak·inrakgipasachim. Uni indake jikko·deko mande minggija aro niotangko aldu·mittanggija dokrara·satrara dakani gimin mahari melaa·saldongan changni chang ong·pilengahani gimin, nokdangan so·so jeng·jeng dakpilengahachim. Salsao ma·gipani a·bachi re·angmittingo, Misalchide be·en an·sengjaenba noko dongrikaha aro segipaba ua salode nokoan dongachim. Ua saloba, maioba pa·sike jegrikna a·bachengtaiaha aro jikgipako dokenba a·palchi salrurugalataha. Jikgipani jak ro·ongo nanggake jakasichipak ringretaha aro bilonge saknaako man·aha. Saknaa amchakjae, Misalchi segipako nokoniko rikalataha aro indakmitingo Misalchi ma·gipa a·bachini sokbae, demechikni saknae grape dongengako nikeaha indiba segipade katsoaha. Demechikgipani jakko nion rongretaiasa ine ma·sie, ma·gipa salatoa, tiktak biapo donpilatna man·enba, adita salni ja·manon nampilaiaha. Dikdiksani ja·manon Kallepba Turachini re·baaha aro indaka obostako nikenba nogipako manengaha. “Nang·koara indaken inean skangonin aganachimba, mikkangchi mai ong·gen mamingkoba chanchigija pante sila nikana mikcha joljolaigipade indaken ong·e ra·ronga, jika·sea ra·a ingipade dikdiksana ra·a ong·ja, chasong gimiknasa. Uni gimin jora·ripengko baseon Isolni skanina sengna nanga, aro ma·a·paara mai dakako nangnika ukoba uichakgrike dakna nanga, maina ma·a·paade a·gilsakni Isol, uamangde an·tangtang cha·tote nikesa aganengani gimin ong·akosa agana. Da·o na·a an·tangni skagita dakahanio, an·tangnan sastiko man·engjok, mikkangchi indaka a·selo ga·akjana gita mikrakbojok.”

Adatangni ja·mano ma·gipaba Misalchiko  
 agandapaha, “ Na·ara nang·ni Ada Kalleponiko  
 bang·akon skie ra·na nanga, bikode mamingnan  
 aganna skina nang·ja, batesa basakobade pante·desa  
 ong·omangba angnasa aganku·patipilenga.  
 Chonmitingona bateba da·o Turao dongoara namen  
 nambatsrangjok. Bikode nok nokgipaba namen  
 namnika aro detangtengko gitasa jakalenga;  
 noktango depante dongja baksanaba bini kam  
 cholonan namen namnikana, angni mijao me·su  
 mingsa-minggni ra·e on·ango aganatenga. Angade  
 detang ong·oba Kallepnade kratcha·pila, maina bia  
 gisik nange poraiomangba tangka·paisa on·e  
 dakchakna man·paja batesa chutio kam ka·e  
 man·paakoba an·chingnasa donangpilenga. Da·ode  
 biade pante dal·kalenga ma·ate toromnaba gisik  
 nangengana, ukoba Me·katchipagipaan  
 aganatengana. Turao dongoba gisik nangen  
 poraiengana, uni giminan bilsiantian porikkakoba  
 pangnan namen pass ka·na man·simaengana. Ia bils  
 matric test seaba namata ine aganenga,  
 Me·katchipagipani aganani gitade haida nama  
 gadangon pass ka·gen ine skigiparangoniba  
 agantokengana. Je mandean ma·ni·paani kattako  
 mania, skigiparangna bam·a, dal·batgiparangko  
 mande ra·a aro Isolo pangchake janggi tanga,  
 indakgipa manderangde pangnan chu·sokgipa  
 mande ong·chongmota ine Me·katchipagipaba  
 aganatenga. Uni gimin na·aba da·alonin gisik  
 pil·bojok, badegiminkode maiko agankugen indiba  
 mikkangchinasa aganengjok. Nang·ni segipa nang·ko  
 gale katangahaoba, bi·sa·desa gnang brange katame  
 dongna nangoba, nang·ni cholonosa pangchakgen.  
 Da·o na·a me·chikma ong·genchimoba bilsiera  
 mamungan ong·kujani gimin, poraitaina

man·aikugen. Uni gimin angni namnikanide,  
 maharirang na·simangko dongpil-kimpilchina inoba  
 nang·osa pangchakgen. Jorangko kimpile salanti duk  
 chakgenma ba galgriksrange an·tangna  
 mikkangchina janggitangani cholko sangdigenma.  
 Angade kimpilbo innaba man·ja aro galsrangaibojok  
 ine agannaba man·ja, na·a kimna-dongnagipasa.  
 Da·o anga agana dakoba, ambino ma·drangde  
 ma·gipaan skiana inaigen, niosarikoba  
 changsanasan nangaigen ong·ja, ja·man·ja·wil  
 ong·ana ong·jana napna-gana nangjokode mai  
 mikgilo nappa-gapagen; uni gimin na·asa an·tangni  
 gimin chanchiaibojok". Misalchi mikchi  
 jingjangjingjang dake ma·gipachiko nie aganaha,  
 "Ama angade ianpakde mama-adarang drae kimpil-  
 dongpilchina agangenchim ong·oba  
 ra·pilchong·motjawaha, kimpiloba biara  
 namchong·motjawa, batesa bi·sa·desa  
 bang·rorojokode maidake janggi tangsranggen.  
 Poraitaina inoba choljoksrangjawaha. Anga da·oan  
 na·simangni aganako manijae bilsigimikan segipani  
 sastiko chakna nangaha, haida ian angna skiani  
 ong·chongmotaha ine angade bebera·chongmotenga.  
 Da·o ia me·asaoni jokna man·ahaode angaba dada  
 Kallep gita nokkol a·ba gameba poraitaignokchim!"  
 Jorang nokona re·bapiljaengahani gimin  
 Kallepma·ang ma·ningsa chanchirime, an·tangni  
 mama-adarangko, ma·drangrangko aro Jorangni  
 ma·drangrangko tom·ate chanchirimaniko dakna ine  
 uiattokon pilakan tom·batokaha aro dolgnini gisepo  
 bichal ka·e onchina ine songni nokmakoba  
 aganatahani gimin uaba sokbapaaha. Pilak nanggipa  
 manderang sokbatokahaon, maini gimin madrang-  
 mahariko okamchimongha talate on·china  
 misalchima·gipako aganatchengon, demechik

ma·angni nokdangni gimin aganataha ine aganaha. Misalchiko okamatēba kimpil-dong-pilaigenkonba ine sing-on, angade kimpil-dongpilna man·chongmotjawaha maina anga biko ra·pil-dongpilode salsaba kusini balwarangan chingni nokdangonade balbataijawaha, skangoba anga badita dukko chakaha angasa uiaiaha. Anga ia me·asako ra·pile salanti duk chaktaiana batede bi·sa ba·bite nokkol-a·ba gamnape cha·oan, ku·sa rongsa man·akode mikchigri cha·na man·kugen ine grapjoljole aganon, Jorangni ma·drangoni aganatskaaha: "Chingaba Jorangni gimin chakja, maina biade mandean indaktelgipa aro darangni agan·ku·pattianikoba ra·gijagipasa. Chingade a·bachengonin ia bi·sakode maiko dake cha·dilna ine jikgipa kimna am·enga intokachim, indiba Misalchisa kolamgakeming gitichi-nangkambejok. Da·oba chingade kratcha·na nanggen inean re·banade sikjachim. Indiba jekoba dolgni mahari chanchirimna nanggen inesa re·baaijok. Misalchini agana gitan, da·oan namkalkuenga uni gimin uamang ra·griktaina neng·nikchong·motengaha ong·ode ekgrikatsrangan namaignok, maina kimtaibo-dongtaibo ine dranaba uamangan nangrimna ma·jaode an·chingara maikai drakugen. Jorangni kamba changsa-rang·sa ong·jani gimin chingaba kratcha·pila, unigimin dingtanggrikakon chingade namnike re·baaba ra·baaha." Dolgni maharian dingtangrikataniko namnike aganania pangchake, je mingsa-minggni gam dongpaakoba bakgni dake suale on·a ine nokmani aganaton pilakan namnikani gimin, uandaken dakaha. Gipin chanchina nanganirang dongjahani gimin, song·gimin-changiminko cha·sik-ringsiktoke noktangtangchi re·angtokaha aro Jorangba chongipa

demechikna ka·pakgenchimoba an·tangni pilak  
dakgimin kamrangko nipilate, an·tangon chugimik  
dosi ine nike mamingkoba agana pajae, jeko dolgni  
mahari tik ka·aha ukon namnike; ma·drang baksa  
songtangchi re·angaha. Ua sal intal Misalchima·ang  
nokdangona kangal ong·ani aro cha·asianirangchi  
neng·nikanirangna agre maming dukni aramrang  
simdaptajaha.

Songo antigni dongani ja·mano Kallep  
an·tangna aditan tangka-paisarangko chimongaha,  
maina ua chutini somoirango ma·gipa baksa gipino  
gamnap-rim·nape tangkarangko man·paha. Chuti  
bon·angan baksa matricknaba poraina nangjolgen  
ine Turachi seng·gnangan re·angpilaha. Poraiengon  
ua gipinosa dongpaengani gimin salode poraina  
man·pajachim indiba je somoi man·akode ua maming  
saloba gimaatjaha. Jensalo matric porika ong·aha ,  
tarisogiminrang aditan chu·ongani gimin suk ong·e  
seatna gita man·aha. Porikka matchote jolde ua  
songchi re·angjaha, maina uni donggipa noko gipin  
kam ka·giparang dongjaani gimin pilak kamkon  
Kallep dakna nangaha. Matric porikka knana skang  
antignimang songo rona re·angna ine nokgipao bi·on  
uamangba watataha. Kallep songtangchi re·angna  
am·engani gimin nokgipa gari parana aro songchi-  
nokchi maikoba ra·e re·angpachina ine tangkarangko  
on·ataha. Bi·jagenchimoba on·atahani gimin mitele  
re·angha aro mipring cha·mane attamni gario  
re·angna am·enga ine nokgiparangna aganjolaha.  
Kallep chuttio songo roani ja·mano re·bapiltaina  
miksonge, an·tangni ba·ra-cholarangkode bon·e  
ra·angtokajaha. Matric semane songona rona  
re·bagiparang bang·ani gimin pante -metrarang  
songo bang·beachim. Songni panterangoni toromna  
gisik nanggiparngoni Kallepba saksa ong·pae skina

changani gimin songni me·apa –me·chikmarang aro pante-me·trarang pilakan namniktokachim. Robibar salsao Kallepko skina donatahaon, da·alde Kallepni skianina ine songni me·apa, me·chikma aro pante-me·trarangba gilja nok chakpilgija re·batokaha; maina uamangni gilja nokara songadamnisa ong·ani gimin chonbeachim. Kallep Sonibar salosan mangmang songona re·bagenchim ong·oba an·tangna tikatgiminko chu·sokatna ine giljachi re·angpaha aro somoi ong·ahaon pulpitona re·ange Isolni dilaniko man·a an·tangan bi·chengaha. A·bachengao ua dingtangdingtang golporangko aganchengenba, Sastroni Kattarang baksa saldime skiatahaora, pangna aratgipa aro tusidimugiparangba ku·ange kantimtokaha, maina uni skianirangara Bible Kolej-o poraigiminrangni skianirangna batpilen ga·sua ine manderang agantokachim. Kallepni skiani somoio magipaba gisk nangbeen knatimengachim aro gisiktango indake chanchiako gam·kale aganman·aha, “Ia bi·sara pagipni taningkon man·akon da·nang, pagipa dongkuode biaba detangni indagipa kamrangko nike baditan kusi ong·pagnokchimi!”

Anti gni songo dongani ja·mano matric result ong·ahaon, Kallepba skanggipa gadangon pass ka·aha aro apsan nokon donge poraianguaha. Kolej-o napna ua somoiode bang·gija tangkarangkosan nangaiani gimin an·tangni kam ka·e chimonggipa tangkachin chu·ongataha. Uni nok nokgipaba Kallepni matric pass ka·anina suk ong·enba kolejchi gane re·china ine longpen aro cholako kingprak bree on·aha, jekon ua P.U. ko poraia gimik gane re·pana man·aha. Kallepni gunrangchi uni nokgiparangko muni nangatahaoba, uamangni demechik Me·katchini gisiko on·tisa mikbuanirang dongachim,

maina uade poraina gisik nangbegipa ong·pajae matricoba gittangipa gadangosa pass ka·aiachim aro P.U.-ko poraioba uan uan ong·aengachim. P.U. final porikkako seani ja·mano, Kallep bang·a chutini salrangko Turaoan re·ataha, indiba antisamang songo rona ine nokgipao bi·enba reangtaiaha. Adita salrangni ja·maon result ong·aha ine knaenba, Kallepba uni ripengrang baksa result-ko nina gita Turachi re·angtokaha, maina ua somoio songadamrangode songbadrangkoba man·pajani gimin mamingnan Turachisa re·na nangaiachim. Turachi sokange porika resultko niora Kallepde ia changoba skanggipa gadango pass ka·taiaha aro an·tangni resultko aganjolan baksa, rakkikua ong·ode B.A.-koba donge poraikuna ine chanchie singjolna nok nokgipachi re·pakangjolahachim; indiba demechikgipa maikoba uni songo dongmitingo tol·e on·soenba, Kallepko niksoarion Me·katchi ma·gipa namnikgijaniko agansoahani gimin, an·tangni donbagipa ganding chindinrango ra·jole songona re·bapilaha. □

### **BAK -3**

#### **KALLEP PORAIENGMITINGON AN·TANGKO ARO MA·GIPANI NOKDANGKO NIROKNA NANGAHANIO SORKARIO KAMKO AM·E KA·NA NANGAHA:**

Kallep jensalo an·tangni donge poraigipa nokoni ong·katna nangahaon gipino donge poraiangkuna ine sandioba man·jaha. Turao donge poraina nok man·kujaomangba, B.A.-ko poraina ine kolej-o join ka·e donchengaha. Indakmitingo office ge·sao kerani-ni kamna biap donga ine knaenba

dorgastoko on·paon, sing·sandiniko dakanio pass ka·pae kamko altuen man·paaha. Kallepni miksonganirangko uni kangal ong·anina agre mamungchiba champengna man·jaha. Maina ua jeko dakoba inditan bimchipgipa ong·ani gimin chu·sokna gita altuen man·rongaiachim. Kallep sorkario kamko ka·na rakkiako man·enba, an·tangko aro ma·gipani nokdangko simsak-nirokna man·gnok ine kusi ong·beaha. Kam ka·chengaoni jagni mangni ja·mannon ua ma·gipa, nogipa aro namchikgipa sakgitamkon an·tangbaksa dongchina Turaona rimbaaha. Office-o kam ka·genchimoba ua an·tangni poraianikode dontongjaha, maina an·tangni dal·batgipao, choljoka somoirangode kolejchi re·na ine bi·on on·ani gimin kamrang donggijani somoiode kolejchi re·rongaha. Ua an·tangsan poraijaha, indiba nogipa Misalchi aro namchikgipa Ripamchi-ma·angkoba poraiattokaha. Nogipako walni skul-o aro namchikgipako Nursery- o admission ra·e ong·aha. Kallep office-o kam ka·engon bimchipgipa aro kam changgipa ong·ani giminnan office-ni manderang uko namniktokaha. Uni namaniara office tangnasan ong·jaha, indiba a·paloni re·bagiparang gimiknan dakchakaniko on·na namnikgipa ong·achim. Unigimin Officer-rangko sandiana bate Kallepkosa kerani-babu re·bakujama ine sandibatrangachim. Office kam ka·jole poraiengon ua B.A.-koba joljolan pass ka·na gita man·aiaha. B.A. pass ka·ni ja·manoba Honours-koba poraikuna ske an·tangni officertango bi·oara, ukoba dakna onani gimin admission-ko dake donaha aro porikka seani somoio sepaoara ukoba neng·mangijaan pass ka·taiaaha. Kallepni B.A. English Honours pass ka·ani bilsio nogipa Misalchiba klas 10-o poraiegachim aro nogipani gisikba ua somoirangode skangogita ong·jahani gimin



poraianioba gisik nange poraienba, bilsiantian nama gadango pass ka·rongaha.

An·tangko aro ma·gipani nokdangko namatna ine chanchienba pilak kamrangko dakengmittingon, Kallepna nengnikani sokbaaha, maina uni B.A. Honours pass ka·daldale dongenmittingon ma·gipa bilonge sagitikaniko man·e Tura Civil Hospital-o sannaniko dakahaoba namatna man·jae siangaha. Uamang Turaosa donggenchimoba, ma·gipani manggisikode songtang, An·chenggopgre·ona rangenba ma·jongtangma·angni noko pilak kamrangko dakenba, pagipa sagiko gopgipa sambao gopaha. Manggisiko gopani salgittamrang ja·mano Kallep ma·ang Turachi re·angapilaha. Mgipani siani ja·manoba ua adita neng·nikaniko man·angkuaha, indiba uan nokdangni giminde ong·jachim. Uni neng·nikaniara, ua an·tangni poraianiko maming saloba dontongnade sikjachim indiba ianpakde obostarangchi dontongna draengachim; maina Turao University dongjahanio ua M.A.-ko dakangkuna ma·jaengachim. Neng·nikanirangko chanchie donggenmittingon ua songbat kingsako poraenba M.P.S.C.-o kamna nakataniko nikenba dorgastoko on·e donahaon, okamaniko man·e seanio aro sing·anirangko dakanirangoba namen dakna man·ahani gimin department ge·sao officer-ni biapona watatako man·e kamo join ka·aha. Gital Kamko man·ani ja·mano giticham kamoniko watani chitiko ra·na ine ua Turachi re·angpilaha. Jensalo kallep office gitichamchi re·ange kamoniko watchina bi·ani chittiko officer tangna on·eon, watatna sik·jaoba nambata kamko man·engahanigimin watatnan nangtelaiaha. Ua Shillongo kami ka·genchim ong·oba ua bilsiode nogipa ma·angko rimangjaha, maina ua somoio Misalchiba matric sena am·engahanigimin aro

bilsi tong·sade skul·rangko dingtnatnaba neng·ani gimin rimbitangjaha. Nogipa ma·angko Turao dongale re·angna nanggenchimoba ua Misalchina on·tisaba kenchakna nangani dongjaha, maina uaba da·ode an·tangni mikkangchi janggi tanganina maiko dakna nangachim, namen ma·siaha. Office Quarter-o donangkuna chol ong·jawha ine nike, nodrangna nok para sandienba donangaha aro an·tangde Shillongchi gitalgipa kamko ka·joljole poraikuna miksonge re·angaha.

Kallepni offcer man·aniko aro nogipa Misalchini poraianirango name dakenganiko knae pajongtang ma·angba kusi ong·bee indake golpotokgengachim, "Ia mandeni gimin chanchie angade baskobade mikchirang ga·akpila, cholgri-apgri ong·omagnba indakgipa gadangona maidaken sokangpilaha; Isolan uamangkode chu·sokna chol on·aha ine angade bebe ra·chongmota, maina ua an·tangan Isolo pangchake janggi tanggipa ong·a. Ia salrangona uamangni ma·a-paa tangkuode, uamangko nike baditan kusi ong·pagnokchim da·nang!"

Kallep Shillongo dongenba, man·gimin kamko ka·joljole M.A.-koba private join ka·na man·gipa kolejo admission ra·e donaha. Aro iarangni gimin an·tangni dal·batgipa-ni namnikpaaniko man·esa iarangko dakaha. An·tang Shillong-osa donggenchim ong·oba, nodrangna dakchakanikode jaantian on·atengachim. Misalchima·ang ma·ningsasan donggenchimoba ia somoiode nogipana maming kenchakna nangani dongjaha, maina uaba adatanggitan an·tangko an·tangan sasonni ning·o (self discipline) dona man·ahanio, uni pilak kamrangan skango gita ong·jaha. Bilsirang bon·angengon, sin·karini balwarang balbae

ka·sinanirangko ma·ne, Misalchima·ang  
 ma·ningsaba porikana poraitokengmitingo, Kallep  
 nodrangko grongna ine Shillong gario re·baenba  
 attam 6 bajimango nokona sokeaha. Mamatangni  
 re·baengako Ripamchi niksochengenba, da·alde  
 mama re·baenga ine ma·gipana agansoaha. Ripamchi  
 ua bilsio klas 4-o poraiengahani gimin aditan  
 dal·kalaha. Kallep nokona sokahaon, au·miksuchina  
 ine chi ding·atenba, auchakram biapo chirangko  
 tarichina Ripamchiko aganenba ma·gipa atangde  
 adatangna mi·bi·jak song·skaaha. Au·miksuman·e  
 cha·chini ringenba dikdiksa nen·takani ja·mano  
 nodrangna ba·ra·chola ra·baako bikote on·ahaon,  
 nogipa aro namchiktang mitelenba ra·chaktokaha.  
 Mi cha·manringmane attamo golpoe romitingo Kallep  
 nogipa aro namchik tangko gisik nange poraitokchina  
 aganenba, mikkang bilsiode na·simangba Shillongchi  
 porai tokande ine aganon, namchikgipa Ripamchide  
 bilongen kusi ong·beaha aro ua somoi intalan bi·sa  
 ma·at ma·at gisik nangge poraia ma·gipa ge·etnan  
 nangpiljaha. Kallep Turao salsa saldonggenba  
 Somabar pringon Shillongchi rangpilaha.  
 Misalchima·ang ma·ningsa ia somoirango porikana  
 poraienba aditan kamrang bangbeengachim, maina  
 degipara bilsini polrikka ong·enga aro an·tangara  
 matric test-ko seengachim. Porikkarangko seanio  
 uamang maming neng·nikanirangko ma·gijaan  
 matchote aro name sena man·tokaha. Porikka seani  
 antignini ja·manon uamangni result rangba  
 ong·ahaoara, nama markrangko man·e pass  
 ka·aahani gimin Ripamchide mamatangna uiatna  
 sike ma·gipako pon ka·atchina dekdo ka·e dongani  
 gimin pon ka·aton, mamagipani kusi ong·chakani  
 kattarangko aganataniko man·e Ripamchi kusi  
 ong·beaha. Nodrangni nama result rangko knae

Kallep namem kusi ong·beaha aro matric-na gisik nangbate poraichina nogipako aganatjolaha.

Kallep office-o kamrang bang·beoba antangni dakna nanganirangkode salgipinona donrongjachim, jeni giminan uni dal·batgiparang uko namnikbeaha. Jensalo ua office-o kamrang dongjachim, ua somoikode klaschi re·na jakalskaaha, maina ua M.A.ko dakengon salanti re·na man·pajawa ine uienba University-ni Dalbatgipa skigipana antangni obostaranko aganman·ahani gimin, gisepgisep klaschi re·angomangba uko mamungba injaha. Gisepgisepsan klas chi re·omangba basakoba internal porikkaranko seaniode gipinrang gitan nama result rangko man·rongengani gimin, salanti re·rongengipa ripeng skarangan kratcha·pilengachim. Bilsa a·bachenbachibara February ja matchotanghaon Misalchi Matric porikkako semane chuttio adatangchi re·angna skani gimin sing·aton, re·angchina aganatahani gimin ma·ningsaan re·angtokaha; maina Ripamchi-Mangba sobarangna chutti watjolemung skul kulikujaengachim. Adatang baksa Shillongo antisamang romitingo, pilak nie rona namgipa biaprangkode an·tangni gari, office-ni on·pagipao roramdile nidilon, Ripamchide suk ong·enba Shillongon dongkamna sikaengha ine mamatangna aganon, anga na·simangkoara ia bilsiode Shillongo poraikande inean da·sikkarion aganahachim, indiba da·o nang·mani matric resulto pangchaken ine aganon; angaba pass ka·telaigen indiba skanggipa gadangonasa sodoama sokdojawa uijaenga ine nogipa aganjolaha. Na·simang indake ka·donge aganenga ong·ode Shillongon dongkamaibojok, mikkang anti Sonibaro na·simangni ba·rangkode salna re·aignok ineba adatang uamangna aganaha. Mamagipani indake

aganako knae Ripamchi bilongen ku·si ong·beaha aro an·tangtangni skango maikai janggi tangbaachim uaranko chanchiate Misalchini mikrononi mikchirang joksolaniko nike, amara maina grapeng ine ma·gipao sing·aha. Ma·gipa aganaha, “ama na·ade skango maikai janggi tangachim mamungkon uibajaha, nangpani dongmitingo an·chingni nokdango mai ong·hachim ukoba na·ade ma·sibajaha. Anga salantian nang·pani jakchi doka cha·an baksana, basakobade chinga mi patisakoan salgimiko cha·naba man·jaha. Nangni mamaara Turaosa gipin noko donge duk chake poraiha aro chingara nang ambiming sakgni gipinrango kam ka·napesa cha·aha. Nang·pade salantian chu ringe, joa kal·e attam attamosa nokona re·bae angko sasti on·rongaia, indiba nokona merong-mechu ra·baani kattade dongsrangja. Indiba nang·pani indakpile chingko duk on·aniko nikemung ma·drang-mahariko tom·ate ekrikataniko dakes da·o an·chingba poraitaina chol ong·enga. Ia pilak an·chingna ritchenge janggi tangani cholrangko ra·bagipa nang·ni mamaan ong·a. Ua an·tangan Isolo pangahcke janggi tanggipa ong·ahani gimin, **Nokgipa** una aro an·chingna indakpile pattianiko on·engani giminsa angade ku·si ong·a am·chakjae graepilenga. Angni gisiko indakgipa gadangona sokbae officer-ni kamko ka·na ma·gen aro uni office-ni gario rorame rona man·pagen ineba jumangon nikjachim, mairongpilgipa Isolni pattiani! Unigimin nono na·aba, ambin-intang chinga nang·ko nirokna man·jahaoba Isolko gualpanabe aro ia somoirangonin an·tangni janggi tanganiko Unan pakwatbo, unosa Ua nang·na chu·sokani ramarnagko mesokgen.” Nogipa Misalchini su·ugipa kattarangko agane, demechikgipako ku·pattianirangko knattime

Kallepba billongen ku·si ong·beaha, maiana nogipao skangode indakgipa gunrang dongsrangjachim, jeni a·selan ua seng·gnang segipa ra·anichi a·bachengo bang·a dukrangko chakna nangbaaha. Misalchima·angni Shillongo dongengmitingon matricba result ong·aha aro office-o dongmitingo Kallep nogipani Roll No.-ko nina ine result sheet-oniko sandion skanggipa gadango pass ka·aniko nike nammen kusi ong·bee nogipana pon ka·ataha. Kallep ua salode office oni seng·gnang ong·katbaenba, antioniko be·en aro na·tokrang baksana cha·anirangkoba brejole re·baaha. Nokona sokon nogipako nikenba kusi ong·chakani kattako agane salam ka·aha. Salgipino uamang Turaoniko skulni pilak nangarangko ra·an baksa ba·ra\_cholarang ra·na ine office-ni on·gimin garikon ra·e re·batokaha. Turaon uamang adita salrangna dongna nangaha, maina nanggipa lekkarangko matchotesa uamang re·angpilna gita nangengachim. Antisarang Turaon dongani ja·mano pilak kamrangko matchote Shillongchi re·angpilaha.

Kallep pajongtang ma·angba uamang gimikan Shillongosa dongtokenga aro Kallepde Officer-ni kamko uchin man·ahana ine knaenba bilongen kusi ong·chaktokaha. Nokgimik golpoe romitingo pajonggipa indine aganeaha. “Ia pilak chu·sokanirangara adatang Kallep-ni a·selsa ong·na man·aha, maina uade chonmitingonin gipin bi·sarangonide nanmen dintangbea. Kam ka·oba, jeko dakoba gisik nange daka aro poraioba uandaken namen bimchipgipa ong·a. Jensalo bilsokaha unode Nokgipao pangchake janggi tangsikaaha. Uni indake nangipa gunrangni a·sel aro Isolo pangchake janggi tangani giminnan da·o nokgimikan pattianiko man·engaha ine angade bebe ra·a. Na·simangsa

chingni aganakoba knachakja aro jeko dakoba gisik nange dakja dakani giminnan seng·gnang jik-se ra·emung chinggitan ong·sie janggi tangtokengjok.” Kallep ma·jonggipa (Tokchangma) , mamagipachiko nie aganaha, “Me·jakapara sikango nang·ni mingglok gipa Kallepkode gisik ra·kuengakonba, da·ode biade Shillongosa nogipakoba rimdoange poraiatenga aro an·tangara officer ong·e·gari sale rona man·pilengjok. Mija mangmang nogipani matric resultni lekkarangko ra·na re·bae nappakangtoka. Grigipa aro namchikgiparnagna Shillongchiko maikon maikon ra·bachima donangtokakon. Indine aganatoba detangko mitele agana gita dakaia, namakode nama, bokakode boka inean aganara nangaia. Na·songara gisik nange nokkromna kange donode man·rikgenchimba, da·oara sakoba tik ka·arang dongama dongkujaenggen uiatna man·ja. Biade da·oba poraikuenga inajokona haida tik ka·arangde dongkujaenggenkon, indiba dal·a-ro·askakosa sandienggnokkon.” Me·jakpa aganskaaha, “Angaba maiko dakgen, an·tangara kimjawa-dongjawa; kimnakgipa-dongnakgiprangko sing·e niora namnikani-mikchaani kattakon aganjaode kange-binge ninaba namjajok.” High Skulo poraimitingode Me·jak aro Kallep apsan klass aro apsan skulo poraiachim, indiba Kallepara kangalni bi·sasa ong·ani gimin gipinosa dongge poraina nangha aro gana china dongpajani gimin sile-name tarie ropanaba man·jachim. Mejakpade bading-chiwale aro contract dake nokdangko aldu-mittanggipa ong·e alamala cholikal·ani gimin, demechikgipako Hostelosa done poraiataha aro gana chinanirangkoba chu·ongagita ra·e on·a man·ani gimin tari-tilonge dongna man·achim. Mejak suk ong·e poraina man·genchim ong·omangba porainade

gisik nangipa ong·jae klas 8 aro 9 -rango poraimitingo bilsiprak fail ong·rikan baksa matric-oba bilsisa chu·sokjae Kallepnade bang·en ja·manchakrikaha. Kallep lekka man·begipa ong·oba, kangalni bi·sasa ong·ani gimin Me·jak uko mikchepaha aro ramarango grongoba giseposan sing·rongaiachim. Mamatangni demechik ong·omangba choligipani demechik ong·ani giminnan Kallep de ua somoirango Me·jakko grongomangba sing·nan pa·jachim Me·jak bisli brirang Kallepna ja·manchake pass ka·genchimoba, jensalo matric pass ka·aha pagipa uko kolej namkalao poraiatna ine Shillongchi hostel-o donenba poraiataha. Unigimin Me·jakde Kallep ma·angna skangan Shillongode dongsoengjokchim. Ua matric-o gittamgipa gadangosa pass ka·aigenchim ong·oba namkala kolej-o poraienba aro jila dal·ao dongenba aditan tang·dokale pass ka·bana gita man·baaha. Kallepma·angni Shillongchi re·angani somoio Mejakde klas 12 porikako seenba resulna sengsoengmitingchim.

Kallep Shillongchi sokangahaon nogipako kolej namao aro namchikgipakoba skul namao poraiataha. Salsao Kallep nodrangko kolejchi an·tangni gario salangmitingo, Misalchi Me·jakko bajarchi uni ripengskarang baksa re·baengako nike adatangko gari dongdipbatenba sarigipamung salam ka·e golpoaha. Me·jak Misalchi ma·angko nikenba del·dik dakaha aro mainaba re·baama ma ianon dongkamengjok ine sing·oara, chingaba ia bilsionide dada baksa Shillongon donge poraina inengachim. Me·jak Kallepko gario asonge dongengako nikenba aiao inmanaha, maina Kallep gari salna changgen ine uni gisiko on·tisaba chanchijachim. Kallep aro Me·jak uigrikenchim ong·omangba ua somoiode



kusik on·grikna pa·jae, sarisani golpoako knatimenba ja·mano nodrangko skulchi salange donaiaha. Me·jak ua sal intal Kallepni gimin chanchie nina a·bachengaha, indiba uara mai kamko ka·emung gari salengachim, uako uina Me·jakni gisiko sikbeengachim. Salgipino Me·jak an·tangni certificate rangko attest ka·na nangani gimin Directcorate Officechi re·angon, darang officer·ba sokba·kujaengani gimin, sandion room ge·sao officer asongeha ine pion saksani aganani gimin porda kike·ming bi·na niatora, uan Kallepsachim ine uie del·dik dakmitingon, napangchina aganahani gimin napangoara, asongsrangchina aganaha. Me·jakko asongatenba certificaterangko attest ka·mao Kallep pion saksako okamate cha ra·echina aganaton, nangaowa angade da·osa mangmang mi cha·e re·ba ina dake ong·katna am·engachim, indiba Kallep cha ringgijade watatjawa ine certificateko ra·e donga dakon krat cha·enba chakchike cha ringesa re·bana nangaiaha. Kallep Me·jako sing·aha, “Na·ara basakoni Shillongo dongengachim? Chingade ia bilsiosa gimikde dongenga indiba angade da·sikari bilsitongsa re·baa, chonoba·remoba ia da·o angni ka·enggipa kamo join ka·na re·basoa. Nono Misalchikode ia bilsisa matric pass ka·eming iano poraiatna ine rimbaaijok. Skangniba katta ra·jae segipa kima dakesa ja·manchakjok, segipaming galgrikani ja·manosa anga poraiatengjok ma·ningsakon, degipade da·osa klas 5 ong·enga. Jeba ong·bo indaken jenetene janggitangpaengjok chingade. Na·ara poraikuenga ma banoba kam ka·engjok?” Anga iano donga ia bilsimung bilsigni ong·engjok, indiba angade poraiengasa kam ka·kuja, da·abilsisa 12 finalko seeming result·na sengenga ine kratcha·bea gngang Me·jak aganemung cha ringe

aro mittelebung Kallepni kutturioni ong·katangaha. Da·o Me·jakni gisiko namen dongtojabatengachim, maina ua skango pa·gipani Kallepko an·tangna nokrom kangna am·ako aro an·tangni ua somoio jegalgiminko gisiktango chanchiatengachim. Indiba Kallepni dal·gipa mande ong·an baksa namgipa cholonrangko chanchiate Me·jakni gisikode unan chanchi batroroengachim. Kallepba ua somoiona kingking darangkoba mikchaa·ka·saa dongkujachim, indiba Nogipako poraiata matchotkujana aro una kamko man·e on·kuja dipetna darangkoba ra·na·kimna uni gisiko chanchisoani dongjachim. Me·jakni gisikba ia somoirangode skangogita ong·jahachim, maina skatang ong·katna man·gijagipa hostelosa donge poraian baksa toromo janggi jangbaahani gimin an·tangni mikkangchina chanchie dakna uiani aro an·tangni cholonko rakkiani dongaha. Ua gisiktango Kallepna miksonganirang donggenchim ong·omangba darang ripeng skarangnaba aganjaha. Indiba Isolo bi·e sengan baksa an·tangni poraianikoba gisik nange poraienba B.A.ko gnigipa gadango pass ka·paaha. Me·jakni B.A. pass ka·ani bilsio Misalchiba P.U. pass ka·enba B.A. 1<sup>st</sup> Year poraiengachim. Shillongo dongengon Kallep bang·a changon giljarango skirongaha aro nogipapa me·chikmarangni aro B.Y.F. giljarango bak ra·rongemung Me·jakni toromna gisik nanganirangko nikenba aiao inmanaha. Maina Me·jakba Turao poraimitingode skatang daggipa ripengrang baksa rorime a·gilsakni ku·sirang baksa janggi tanggipasachim. Me·chikmarangni Programme-rango Me·jakni skianirangko knae Kallepba gisiktango suk ong·beaha, indiba uni gisikode Me·jakna on·tisaba chanchianirang dongjachim, maina an·tangko skango jegiminko ua gisik ra·kamaengachim. Indiba uni

gisiko mamung ajak sokha sikani dongsrangjachim. Me·jak an·tangni B.A. pass ka·ani attamo Kallep ma·ang adasa ma·drangkoba okamatenba mi cha·ataha aro bia·aniko dakanio Kallepan ka·dilaha B.A. pass ka·ani ja·mano poraiangkuna sikani Me·jakni gisiko dongjaha, indiba office kam ka·enba segipa kime dongnasa uni gisiko sikbeengahachim, maina uni pagipaba bilsirang re·angengahani gimin nokdango dakchakgipako nangengaha ineba ua uiachim. Unigimin Kamna nakataniko nikenba office ge·sao galaha aro singsandianiko dakanio pass ka·eming kamo rakkianiko man·aha. Me·jakba da·o office kam man·eming salantian officechi re·na nangaha aro gisepode Kallepko grongeming bini gario re·angrongachim, maina Kallepma·angni office buildingon uamangni officeba apsanchim indiba room no·-rangsa dingtang ong·aiachim. Gisepo Kallepni gario office re·angmanoara setangni sambao re·engagita Me·jakde chanchi-man·pilengachim, maina uni gisikode Kallepna chanchian roo·rotoja dongodongtoja dakbeengachim. Indiba da·nang Kallepni gisikode on·tisaba chanchisik dakanian dongjachim. Ia somoirango Me·jakni gisikrangba namen dingtangsrangaha, maina skangode ua an·tangko tarie pante balana agre gipin kamrang dongjachim aro songo-noko dongoba ma·na-pana kam dakchake aro song·e -chane cha·e dakani kattarangko aganan nangsrangjachim. Indiba da·ode an·tang officeo kam ka·genichimomangba song·na-chana mande rakkigija an·tangan nogipa, Do·kime baksa donge, song·e-chane cha·engachim.

Me·jakni gisiko salsana batbat, Kallepna chanchianirang batroengachim aro gisepo uni gario salako man·oara an·tangko namnikengagitaba uade chanchie robeengachim. Gisiko namnikbegenchim

ong·oba seatachi parakchengnade pa·jaengachim; indiba an·tangni sikaniko Isolna pakwatnade uaba gualrongjaengachim. An·tangni skaniko mai cholchi parakchenggen, uanigiminba Me·jak chanchibeengachim. Me·jak an·tangni gisiko chanchianiko aganengon indine aganman·aha, “Me·chik ong·e angan an·tangni chanchianiko aganchengjaode, angni skaniko uara maikai uigen, aro indakgipa me·asako saobasa man·ahaode mainasa angara seeba nichengjajok ine chanchiman·gen.” Dongo dongtojae, roo rotojae an·tangni skaniko parakataignok, aro kratcha·aoba nama dake dongaignok ine chanchie, sentence gittam kattarangkosan Englishchi indine seatchengaha,

*“My friend if you don’t have chosen anybody for your life partner yet; I was longing to be with you as your partner. If you would agree, let us put our head together and pray to God, so that every thing will be done according to His will. This is my proposal only, if you do not agree I will not mind, but just reply in time.”* From: Me·jak

Me·jak an·tangni segimin chitiko uamangni pion saksako watate on·eataha, indiba office-o poraina somoi dongjani gimin nokchi poraigen ine Kallep poketo chipe ra·angaiaha aro ua chittiara Me·jakni ong·gen ine uni gisiko on·tisaba chanchiani dongjachim. Office jokemung nokchi re·anghaon an·tangni poketni lekbarang gimikon ra·oteming te·bilni kosako done auna re·angha. Adatangni aumitingo nogipa chittiko nikemung, ia chittikode angade Me·jakni jakgita nikaia ine gisiktango chanchichipengachim, indiba adatang aue

re·bapilomangba sing·na pa·jae jrip dongaiaha. Au-  
miksue aro cha·chini ring manenba neng·takmitingo,  
chiti man·bagipako poraie rona ine kutturichi  
napangenba poraie nion, Me·jakni chiti ine ma·sienba  
gisiko del·dik dakaha. Chittiko man·enba maiko  
dakgen ine gisiko chanchibeengachim, indiba nogipa  
Mesalchina Kam man·e on·kujadipete uni gisko  
jikgipa ra·na chanchiani dongkujaengachim. Misalchi  
Ua bilsiosa B.A. 2 –gipa bilsu ong·engani gimin da·o  
bilsibri ba bilsu bongakode sengna nangkugen ine  
chanchiaha. Indake ong·genchim ong·oba  
sechakanade nanggen aro man·jawa ine seatoba  
Isolni skani ong·jokode ja·mano namjawa ine  
chanchie, bang·gija kattarangchi indake  
sechakataha.

*“At this moment I am not being able to tell you ‘  
Yes or Not but wait, if we are in God’s plan, everything  
will be done in due course of time, but we’ll have to  
wait till the time is ripen. From: Kallep.*

Salgipino Me·jak Kallepni chittiko man·soe adita  
gisiko suk on·beaha indiba badita bilsu sengna  
nangkugen ukode uaba uijaengachim. Minggipinara,  
sengkubo ingipa kattarangba ong·kujani gimin gisiko  
jajajiji dakengachim. Indiba Me·jak an·tangba Isolo  
Pangchake janggi tangpaenggipa ong·eming,  
Nokgipao bi·e senggenchim ongo·de, Kallep ba ugita  
dakggipa mandekon pattigen ine Nokgipao  
ka·dongenba, jegita bilsu ong·oba sengaigen ine uni  
gisiko tik ka·e donaha. Kallepba ia somoirangonide  
Me·jakni gimin on·tisa chanchie nina skanide  
dongaha, indiba skango jegalgimin kattarangkon ua  
gisiko chanchiatmakuengachim. Ua somoirangoara  
Isolko ma·sikujanigiminsa biaba indakgipa

chanchianirangko chanchiahakon ineba uni gisiko  
chanchipile niengachim. Kallep aro Me-jak ma·ang  
apsan giljaon kam ka·rimani gimin, sawa maidakde  
janggi tangenga namen ma·sigrikaiachim. Unigimin  
Kallepba, Me-jakni pilak bewalrangko nike jegalnade  
sikjae, iarang pilakan Isolni skani ong·ode  
chu·sokani ong·china ine Nokgipanan pakwate  
donaha.

Bilsisani ja·mano Misalchi B.A. Fianalko seaha  
aro namkalen seahani gimin gni gipa gadangode pass  
ka·telaigen ine an·tangni gisiko ka·dongha. Porika  
semane chutio roengmitingo, salsao office dongjani  
gimin songjinmani a·palchi rona ine nogipa aro  
namchiktangko ku·mongaha. Nodrangde  
Shillongona agre gipin biaprangko nikpakujani  
gimin namem re·na kusi on·beaha aro Misalchide  
Sarigipa Me-jakoba rime re·na sikengachim ine  
aganaha, maina uade adatangna gisiko sika  
dongjolemung nogipa Misalchi baksade namen  
ripengba ong·beengachim. Indiba adatang aro Me-jak  
chiti segrikenga inede Mesalchini gisiko on·tisa  
chanchiani dongpajachim. Nogipani aganon, Kallep  
ianpakde darangkoba ringgija an·chingrara  
roramaigen ine nodrangko pringni cha·chini  
ringmano re·angdilaha, indiba ramao cha·na ine  
mirangkode walonin song·eming ra·angtokaha.  
Salgimik roramani ja·mano attamo nokona re·bapilon  
namchikgipa Ripamchiba suk ong·emung  
mamatangko mitelbeaha. Adatang baksa donge  
bang·a ku·sinirangko manemung Misalchini gisiko  
chu·ongnikanirangko man·beengachim aro jikgipa  
kimani ja·manoba watatnan ka·pakgnokon ine gisiko  
chanchie roengachim. Ka·pakomangba kimani-  
dongani somiodè watatnan nangaigen, basakona  
biaba ma·ko-noko aldu-mittarige rochagen da·nang,

angba da·o B.A. pass ka·ahaode chonarema kamrangkode man·ara ma·paignok ine gisiko ka·dimeanikoba man·pilaha. Porikka seani ja gittamni ja·mano result ong·ahaora Mesalchini No.ko paper-o nikeming adatang bilongeng kusi ong·beaha, maina B.A. pass ka·ani ja·mano B.Ed.koba poraiatengmung skigipani kamko ka·china dake on·gen ine ua chanchie donsoengachim. Office oni nogipanaba uni resultko skanggipa gadangon pass ka·aha ine uatahaon, nogipaba bilongen kusi ong·beaha. Office jokenba nokchi re·angon, attamo maikoba song·e cha·dilna ine be·en-bitin aro biscuit-rangko ra·jole re·angenba nokona sokeon, kusi ong·chakani kattarangko agane nogipako salam ka·eaha. Result man·ani bilsiode B.Ed.ko dakna gita somoi man·srapjahani gimin gipin bilsiona sengna nangaha. Jensalo B.Ed.na dorgastoko gale nion pass ka·enba poraipana cholko man·aha , aro poraianio name dakna man·enba altuaen gnigipa gadangode pass ka·pana man·aha. Nogipani B.Ed. pass ka·ani ja·mano Kallep adita suk ong·kalaha, maina uni poraina dakchakanide ianon matchotana ine ua chanchiengachim. Da·o una kam man·e on·ahaode demechikgipakode bia antangan nina ma·skaaignok ineba ua chanchiengachim; aro indaken kam nakatenga ingipanade jeoba gale dondilaha. □



## **BAK -4**

### **KALLEP NOGIPANA SORKARIO KAM SANDIE ONA ARO AN-TANGNA JANGGITANGRIMNA JORA RIPENGKO BASEA:**

Nogipani B.A. aro B.Ed.ko pass ka·ani ja·mano, uamangni dorgasto gale dongipa, skul ge·sani skigipana sing·sandianiko dakna ine okamataniko ma·e re·angon, dorgasto galrimgiparangoni B.Ed. pass ka·gipade Misalchi saksasan ong·ani gimin, mamung sing·a·sananiko dakgijaan kamo rakkiani chittiko sejole, Misalchiko kamo jao in ka·jolchina aganaiaha. Ua somoiode manderang kamko sandina nagkujaengachim, indiba kamnasa manderangko sandina nangskaengachim. Kamo join ka·jolenba adatangni office gita re·pakbbae, kamna rakkiani chittiko adatangna mesokon uaba namen kusi ong·beaha aro skulni dilgiparngna pon ka·atenba mitelpilani kattarangkoa aganatjolaha. Nogipani kam man·ani ja·mano Kalep namen ritchengaha aro uamang adasa ma·drang ku·si ong·bee Shillongon donganguaha. Bilsisamang Shillongo skigipani kamko ka·ani ja·mao, Turani skul ge·sao Head Mistress-na nangengani gimin Misalchiko Turaona kam ra·doaton, adatangko watbana ka·pakgenchim ong·oba kamchi draaniko man·enba, demechikgipako rime re·bana nangaignok ine ua chanchie duk ong·beengachim. Iarangni gimin noko adatangming golpoe roengon,ua indine aganaha. "Na.a nang.ni demechikkode rimangna nangjawa. biade ianon matchote poraiengkan, an.ching sakgni dakchakaina indiba na.ade reangbo. Goverment service-o napahaon kam radoaniko jechakode mikangchina namja. Da.o na.a bilsisa



kaeming Head teacherona watatako man.aha  
nambejok. Iade ong.na amgijani ong.achim indiba  
A.chikrango B.ed pass kagiminrang komibeani  
giminsa da.o na.a indaka cholko man.aha. uni  
gimin na.a re.angaibo. saksan dongna aratdode  
songchiko sakoba rimeming poraiatbo unode  
nang.naba dakchakani ong.gen aro binaba  
namgni ong.skagen". Adatangni indine aganahaora  
Misalchiba Turachi re.angenba gitalgipa kamo  
join ka.eming uanon dongkamaha. Indiba chutini  
somairangode Shillongon dongna sikeming  
darangkoba an.tang baksa rakkigijan dongaiha.  
Ia somoirango ripamchiba klas 8-0  
poraiengachim aro nangipa skulo poraia ma.ate  
an.tangnade cholipaengachim. Re.anggipa  
somairango nokdangko aro nodrangko nirok-  
sandie sko saanirangko chanchiatode, da.o  
Kallepni bal namen ritchengbeha maina ua  
darangkoba dakchakna aro nirokna nanganirang  
dongjaha.

Dakchak-rikchakna nanganirang  
komibeahaoba. namchikgipa Ripamchikode nina  
nangkuengachim indiba koros nangarangkode  
ma.gipaan watatrongengani gimin  
bang.gijarangkosan nichapna nangaiaha. Dakna  
nanganirang dongjahaora. An.tangna jora-ripeng  
baseani giminba Kallepni gisko nabaaha.  
Indakmiting somoio Me.jak chiti kingsako indine  
seataiaha. "Kasaara Kallep, na.a angni kattarangna  
mind ka.jaode anga angni skaniko changsatai  
nang.na uiatna kusi ong.beenga, reanggipa  
somoio nang.ni agangimin gitan anga adita  
bilsirangna nang.ko sengengahachim aro  
an.chingni bilsirangba re.angbeengahani gimin  
ambinode bi.sa-desakon dal.srapatjawaha. Angni

chanchiani gitade Nokgipa Isolba an·chinggita  
 dakgimin manderangni jora-ripeng ranikode  
 namnikaignokkon indiba iasan nang·ni ska ba  
 chanchianiara maidake ong·enggen ukode uija  
 aro nang·ni skani donggijakode angaba dranade  
 sikja. Na·a ang baksa janggi tangrimna skode  
 anga an·tangde nang·kon an·tangni jora-  
 ripengna baseengachim. Iako seeuiatenggipa,  
 nang·ni ka.sachakaniko nangnike sengsoenggipa.  
 Mejak” Jensalo Mejakni chitiko man·soaha.  
 Kallepni gisiko ba apsankon chanchie  
 dongsoengani gimin, nang·ni miksonggani gitan  
 ong·china ine seatskaaha. Sakgnian officeo kam  
 ka·gipa ong·ani gimin salode kam bang·ani  
 gimin re·rame·rorame ronaba jakchakjachim  
 indiba attamo office jokmanede pangnan Kallepni  
 garion officeoni apsan apsan re·barongachim. Da·o  
 uamangni ka·sagrikanirang salsana bate bate  
 batroroengachim. Indiba bia·baru ka·kujani gimin  
 apsan nokode dongkujaengachim aro apsan  
 dongna miksongani gisiko dongjachim, maina  
 uamang sakgnian Mondolio kamrangko jako ra·e  
 ka·enggiparang ong·achim. Kallepko man·eming  
 Mejak bilongen ku·si ong·beaha. maina ugita  
 dakgipa mandekode ua somoirangomangba namen  
 man·a neng·achim. Uni gimin Kallepko an·tangna  
 jora-ripengna basena man·aniara Isolni pattianisa ine  
 ua uichong·mote, Nokgipako mitelan baksa nokdang-  
 ba·ku dakaniona kingking Isolni dilaniko man·aba  
 bi·rongengachim. An·tangni Kallep baksa mikcha-  
 namnikgrikanikoba ma·gipama·angna uiatgijan  
 dongna sikjae chiti see uitahaon; Me·jakpa bilongen  
 ku·si ong·beaha, maina uade skangonin an·tangni gri-  
 sokchiko jakma cha·pana ine miksongani dongachim. Bilsa bon·angachi,

Krismas sepangjolo Kallepkoba songchi rimangjolgen ineba ua chitio janapatjolaha.

Da·o Me·jakpa aro Me·jakma demechikna Kallepko sing·esan·e on·ani gimin golpoe roengachim, indakmitingo Kallep pajongtangma·ang jiksesa adatanko grongna gita re·angenba uamangni golpoako bon·tongatsrangaha. Nio·sarini rona re·baako niksoe nokningchi asongchina am·pok·mora sale on·soaha. Dikdiksa asongani ja·mano Me·jak pajonggipa golpoko indake a·bachengataha. “Mai da·o·rorode namtokengakonba? Chingade mandemangmangde alamala namtokenga, cha·na·ringna dongjaanasa. Maiko agangen angboning, ia bilsiode chingade a·baoba mamingan silja, samba agre dikani gimin gamnan man·jajok”. Me·jakpa aganskaaha, “Maiko agangen angboning, gimikan an·tangtangkosa uiaengjok, chingade ia bilside a·bakode o·srangjajok, o·oba danggram galna o·a gita dakaigen, gamnakgipa mandea dongja. Ma·gipakoara maiko agangen, palang ripeakon chan·a man·pilja, da·anba sko saana, da·anba kang·kare saana inkamaia. Angara roama dakaan noko·songode skatnan man·ja; indake dakam·dakdooba da·ororode cholijaengjok; baburangna tangka on·a bil man·giparangsa ba ong·jaode M.L.A./ Minister dakgiparangko rim·na man·giparangsa dal·kala kamrangkode man·tokaengjok. Maiko dake cha·pilgen uinan man·jaengjok, iarangko agane rooba an·tangtangkon matnanga gita dakaia, maina membor dakgiparangkoba an·chingsa seokata. An·chingan kam ka·gnigipa manderangkode basegija, tol·na man·gipa aro tangka on·a man·gipa manderangnasa pu·ona daktokengajokana. A·songna·jatna kam ka·gnigipa manderangko basee watatna man·genchim ong·ode, rama·jal·ang

gimikchikon tarigenchim unode chinggita kantrek ka·e cha·pagiparangba alamala suale on·ako ka·e cha·pana man·genchim”.

Golpoko dingtangat Kallep ma·jongtanggipa Mejakpao sing·ataha, “Mamagipara Kallepma·ang adasani giminde knajokma? Bisongde da·ode poraia matchote kam ka·tokengjok. Adatangde officer ong·engahana aro nogipaba mijamangmang Turaona Head Madam ong·bajokna, chingaba nogipachiba re·angade dongkuja”. Me·jakpa on·tisa gisiko suk ong·kala gnang aganataha. “Oe, knajokba, mejamangmang iarangni gimin Me·jakan tale chiti seatjok; biaba uchin donge poraia dakengachim, uamangna dakchakaan chingade korok·achok nangpiljok, indiba da·ode abitang kam ka·branga dakeming chingade giseposa watatna nangaengjok. Da·o na·songni Kallepni gimin aganoara angade kratcha·oba agana nangaengjok; kratcha·oba·jaksi chikoba ma·ni·noni jakoan nachil knaaignok·janggil sa·dikaignok ine janapatjolaengjok. Mejao Me·jakni chiti seatani gitade bisong an·tangtangde tik ka·e dontokengjokna, indiba chingasa ma·chi·nochi sokangna man·kujaenga”. Ma·jonggipa aganskaaha, “Chingade nang·koara skangonin rime sale cha·pabo inean aganachimba, ma·gipa sagian nang·kora tangmitingon aganangjokchimba, na·songsa bon·chipata. Rime·sale cha·paoba dake·sue cha·diljaode chingasa kratcha·chakgen aro town·o jilaosa dal·aigipa bi·sa ong·ani gimin o·bite neotangna ka·sana , sadu chatchi sandinade uipajawa. Unode chingni rime·sale cha·na on·gijanan batgen. Na·simangara ma·chi·nochi re·na ine janapenga, re·anga ong·ode maina ole kee re·anggen aro chingchi re·angna nangjawa; maina ma·ni·pal ma·gitan nogipachongchong dongengani gimin

bichin re·angaibo. Bang·eba-jaleba maina re·anggen na·simang bura-buchi re·angtokaiboda, nok nikkuja ong·ode chingoni jonggipako re·dilatangna man·genba”. Nokkode mijao bill on·tisa donggipako okna re·anga dakoara salnieming gari sengmitingo, namchiktangko Ringreo gronge angkoba rimangjolani gimin nok nikjola gita walsa waltubajok, ine Me·jakpa aganaha. Golpoode ro·roroangaigen, sarigipade mi okkrienggnok rama chel·ako re·baajokana, bijak song·aba buchuma ma·ate ka·sinbejok, mamagipara bijak tojaoba migiminko cha·dilangbojok ine Me·jakpani aganaton; nangjawachimba mainasa song·galgaljok ine Kallepma·jonggipa aganaha. Me·jakpa aganaha, “Hai boningara cha·dilangbojok tangode na·songan re·pilangna walanggen, na·simangara tuangchimbo inoba manijaengjok, tojaoba-namjaoba, me·su-samjak dongjaoba, togijako kole galatchimbo”. Okkriade okkrijachim indiba cha·gija-ringgija re·angpiloara mainaba mitchiakon-sosiakon ine mosaba-boningba aganaignok, hai ma·jonggipara cha·e re·sranggnok ine Kallepjongtang jikgipako rimenba mi cha·na re·angaha. Cha·man-ringmane dikdiksa neng·takeming, pajonggipamangba songtangchi re·angpiltokaha. □

## **BAK - 5 :**

### **ME·JAKPA GRITANG-SOKCHIKO MAN·BAENGANI GIMIN MA·CHI-NOCHI SING·ESAN-E NINA RE·ANGCHENGHA :**

Antigipino Me·jakpa an·tangni sadu-jikcholrangko aro jikni mama-ada dakgiparangko, demechikna mande sing·ani bidingo chanchirimna

ine okamattokaha. Ma·chi-nochi re·ani gimin  
 chanchitokengon, wachini somoiode namjawa ine  
 nike a·rak sokbajoko re·ana tik ka·e dontokaha.  
 Tom·ani matchotmano song·gimin miko bijak·samjak  
 dongjaoba cha·e re·angtokbo ine re·bagipa sadu-  
 jikchol aro mosa-boningrangko Me·jakpa agnahani  
 gimin cha·na re·angtokaha aro cha·mitingo  
 mosatangrangoni Me·japakko bal·ekataha. “Mosade  
 chawari officer-ko man·eming kusi ong·prete da·oan  
 wak doksrangjokkon, na·songgita pablik-ni dilgipa  
 dakgiparang indaka somoio wak dokeming sadu-  
 sadina aro mosa boning dakgiparangna song·e  
 aaljaode saniko cha·skana”. Aiao mosa Bilbangpaba  
 bilongatjok, maicholianasa angkoara pablik-ni dilgipa  
 ina dakengjok, ia indaka kamrangode chinga  
 pagiparangni aalani ong·a, indiba ambino na·songni  
 mosa boning gitalrangko bia-baru ka·ani somoidode  
 na·song dakskakanjok inesa da·o na·songna  
 a·botatengako nikjama ine Me·jakpagipaba  
 bal·ekatskaaha. Bal·ekaba bebeba mamingan dongja,  
 na·simangkode okamatade okamatjok cha·angnade  
 man·jaengjok, jeko song·a bijak dongjaoba alamala  
 jaksugalangtokaibojokne ine Me·jakpa ka·dingroroe  
 agantaiaha. Bijakara bang·beake, chingade bakon  
 cha·pilgen basenan changpiljaengiok ine aganjoljole  
 cha·giparang gimikan cha·tokengachim; aro cha·man  
 ringmanoara notkangtangchi re·angtokaha. pillak  
 kamrangan ka·sine ka·sine chu·sokangengani gimin  
 Me·jakpa kusi ong·beengachim, maina officerko  
 nckkromna man·baani kattaba ramramde  
 ong·jachim. Minggipinara ua somoiomangba skia  
 man·kalgiparangde A·chikni bewal ong·genchim  
 ong·omangba mamatangni nokkrom re·nade kusi  
 ong·bretokjachim, indiba Kallep giticham  
 niamrangkoba jegalna sikhgipa ong·ja baksanaba uni

jora-ripengko baseanio Isolni namikani gnang ine uiesa ra·na tik ka·engachim.

Salgipino Me·jakpa iarangni gimin golpoe rona ine namchikgipa. Misalchiona Turachi re·angaha. Turachi sokangon jaljol namchikgipachi re·angode grongjawa ine ma·sie an·tangni nanggipa kamrangna officerangchi re·chengeming attamchisa namchikgipachide re·angskaaha. Mamatamgni sokango Misalchiba skuloni re·angeming cha ringe dongsokuaengachim aro indakmitingo mamtangko niksoe aiao inmansoengachim. Gipin changrango rona re·anggenchim ong·oba chutini somoio aro salosa re·angrongaiachim; indiba waltupilede rorongjachim. Mamara da·alde bachiba re·esa walchangengama ma ronamanchaan re·baama ine namchiktangni sing·soon, da·alde nangchongmotgipa kam dongani giminan nang·ming golpoe rona re·baa ine Me·jakpa aganchakaha. Mamatangko nokningchi rimangenba asongchakram biapo asongchina aganon, barandaon namaigen ine asongenba an·tangni na·tok ra·bagipako namchikgipao on·enba iako song·kapataibo ine aganaha. Asongman·o, mamagipako cha ringchenggenma auchenggen ine sing·on, cha minjokode ra·bachengboda, intango cha ringmane auaignok ine agan<sup>a</sup>ni gimin chako rue ra·bachengaha. Auchina ine gamcharangko ra·bae on·enba. mamara auman·o tugrange neng·taknakode agitchae dongipa kuturi donga ine mesoke on·enba, angade mi song·kuna na·a roaibo ne ine agane donangaha. Ong·aigenba, gipinara-gitchara ong·ja rodilnaba, nang·ni song·man-chanmano cha·man-ringmane intango nangarngkode golpoe roaignok ine agane cha ringmane au-miksue dongna napangaha. Song·manchanmane Misalchi an·tangba auenba

dikdiksa neng·take mamagipana mi tarie on·enba  
 an·tangka apsan an·jolaha. Ua somoio Misalchi  
 darangkoba rakkia dongijani gimin saksansa  
 dongengachim, maina demechikgipade Shillongo  
 mamagipa baksasa dongengachim. Bijakan dongja  
 aro sikkete song·eming maian dakenggen, alamala  
 bijakrangko sae cha·ataibojkne mama ine Misalchini  
 aganon, nambejokba, angade salgimik rorame  
 neng·enba cha·napbejok aro bijak song·aba tobejok.  
 Ching nokdrang, nan·ni sarigiparangsai mi·bijak  
 song·naba changtokja, mande rakkisimsime on·  
 eming song·e·chane cha·jaeming song·na  
 changtokjaengjok, ambino sena·panade maidaken  
 song·e on·tokarok, ine golpojaljole mi cha·to·  
 engachim. Cha·man·ringmane, dikdiksa  
 neng·takenba mamagipani re·baani miksonganiko  
 uina ske Misalchi sing·aha, “Mamara mainamancha  
 re·baesa?” Angara nang·ni dada, Kellipma·angni  
 Me·jak baksa mikcha·namnikgriktokenga ine inani  
 gimin ambino ma·drango noknapaniko dakoara  
 nang·ni ma·jongma·angchi re·angna nanggema ma  
 nang·ona re·bana nanggen uko sing·nasa re·baachim  
 ine mamagipani aganon, na·simangara jawani  
 dakagita waka·do·a ra·ede noknapaniko daknabe  
 iade namgipa bewal ong·ja aro dadani agana gitade  
 na·simang noknapaniko dakna nangjawa man·a  
 ong·ode chone·remeba certificate ra·ani somoio  
 dakanikosan nangnikenga. Bini namnikgijako  
 dakode haida biade ka·o nangnaba donga, ramram  
 ka·o nanggijagiparangni ka·o nangode namrongja.  
 Ma·jongma·angba apsan dake dakakoan  
 namnikenga. Bebegitaba chinga da·o biko watatjawa  
 ina daknaba maio pa·sike kangkugen, ma·na·nona  
 dakna nanga kakketko daktokman·jok, da·ode  
 an·tangka nokdang·ba·ku dakani somoi



ong·beengjok. Indiba iasan da·o na·songko rimangaibo-salangaibo inoba ambino dake-sue cha·diljajoko jikko-deko, niotang o·biteko mande mingjajokode maidakako paldinga ine chingkosa ingen. Na·aba mamatang jakpa ong·eming bini gimin tala, na·song namniktokode rimangtokai, indiba agangimingita sing·na-san-a re·batainade nangjawaha, somoiko niroke na·simangni choljoka somoio dada baksa agangrike certificateko ra·e on·chimai ine namchikgipani me·chikma gitchangita nampreta agananiko knae mamatang aiao inmanpilaha. Maina Misalchiara skangode mama-adani aro ba·rima-sokchaani agana-skiako ra·gijagipasachim, indiba da·o uni bewal, uiani aro toromo janggi tanganirang skangoniko chanchiatode bebra·na ampilgijani ong·achim. Indiba ia pillak namgnirangko Misalchina on·gipara uni adatang Kallepan ong·achim. Golporang matchotman·e walingangengahani gimin, tusichina mamagipana biapko tarienba tusibojok, angaba tugnok ine agane tuna re·angaha.

Pringo pringni chakatenba gisiko suk ong·bea gnang noksam-nokgil re·roroe, balenggipa pulrangko nirore, songjinmani ka·singipa balwarangko chake roengmitingo, mamatangko namchikgipa cha ringechina okamataha. Mamagipa seng·gnang ong·katangna nanga ine uienba mipringkoba seng·ggnang song·e, song·manahaon cha·china tarie on·aha. Cha·man-ringmane officerangchi nappakangtaina nanggen inenba namchiktangni nokoni re·angaha. Man·a nangenggipa billrangko okna sengtimoara attamni 2 bajini garikosa srapeming re·angon songona sokangode on·tisa walsimsim dakangpilahani gimin Me·jakmade gisiko jajrengsobeengachim, indiba ua somoi tiktakon

sokeahani gimi ka·tim dake gisiko dongtoaha. Nokona sokbaeming, na·tok-na·bat aro biskitrangko jikgipao on·enba, ba·ra·cholako okgale done, au·miksuna chidarechi re·angchengaha. Au·miksumn·enba neng·a aro okkriaahani gimin mi tarie dongiminko babilisichi re·ange cha·aha. Cha·man·ringmano nokni jal·engo asonge balwa chakjoljolenba jikgipako mola so·bana agantaha. Jikgipa mola so·baenba, Me·jakpani namchikgipachi re·angani kaborko knana sikbeengjokchim angade ine segipao sing·on. mola ringjoljole aganaha, "Angade skango an·chingni daka kamrangko chanchiate gisiko namen kratchaengachim, ia Me·jak jarini a·sel ja·mano mai ong·gen chanchichenggija an·chingni sing·e·san·e nina am·itingode jea dakeming da·ode an·chingkosa kratcha·atengjok, nokgipade mai mikgilchian chiti setaiming Kallepko man·pilaha angade binaba kratcha·chakata. Indiba da·nang namchikgipaba inditan gisik gnang, skulni dal·batgipa skigipa ong·a ma·ataia, namchikgipakoba nam·akode nam·a bokakode boka inen mitelna ga·akaia. Sarigipani kamrangkode ku·saba nakatja indiba an·chingni re·angna am·enggipani giminde, re·angna nangchongmotjawa aro adatangba indakakode namnikchong·motjaenga ine beng·atenga. Bia ka·e on·a ong·ode man·a dipet chone dake on·chimaibo aro gari·gora ra·na nangjawa, chinga songona re·angeming unoni re·sotangtokaina ineba inatenga. Bisongde indinaigen uade indiba an·chingara ma·drang dolgni ku·monggrikaniko dakchenggija maika·e bia ka·e on·ani gimin chanchijolgen, bisongni aganani gimin dakaiode ja·mano an·chingsa kratcha·gen ine jakgipa aganskaaha. Uaba ong·gen ong·ade indiba aganmika dakade ong·ja gisik nangpretean aganatengni

giminsa angade aganskaenga, ja·mano mama-  
adarangko aro sadu-jikcholrangko okamani somoio  
bisonga badine ina agane nitaiagnok ine Me·jakpa  
agane, neng·beahani gimin tue neg·takna kuturichi  
napangaha. □

## BAK - 6 :

### KALLEPKO BIA KA·NA TARISOANIRANG :

Bilsirang bon·angengon sin·kari  
ong·baengahanio, attam rona ka·sinbaengahani  
gimin songoni pante-me·trarang ramarango rorame  
rogiparang bang·engahachim. Ua Somoio  
Me·jarpama·angni chanchisogimin gita wachi  
ra·gatangengahani gimin Kallepama·angko bia ka·e  
on·ani gimin chanchirimna ine attamsao an·tangni  
mosa-boningrangko aro jikchol-sadurangko  
okamchimongtaha. Re·batokahaon an·tangni  
okamatani miksonganiko talatchengaha. “Mamagipa-  
adagiparang aro mosa boningrang, angade  
na·simangkode cha·gri-ringgrioba okamatahani  
gimin an·tangni miksonganikode uiatengjok. Mijao  
namchikgipachi re·angoara, Kallepna noknapani  
gimin sing·baon uakode dakna nangchongmotjawa  
aro bia ka·ani somoioba dal·e dakna nangjawa ine  
beng·atchong·motenga. Kallep an·tangba  
noknapaniko nangnikchong·motja inatengana aro  
biade aganako drae dakode namnikjanaba donga ine  
nogipade aganatengachim. Iako aganengon  
noknapna re·jawa inede miksongjaenga indiba jeko  
aganata na·simangna aganskaenga, Da·o re·ani ba  
re·gijanide an·chingni chanchiaosa ong·aigen”.  
Mamatangoni aganatskaaha, “Oe, bisongde aganade  
aganatbelegen indiba an·chingde dakna

nanggakode daknan nangaigen, ong·jaode ja·mano kratcha·aniko man·gen.” Indiba iasan an·chingara re·a ong·ode nogipachin re·china aganenga, ma·jonggipama·angde mijao chingona rona re·baeming chinga jiksesani mikkangon aganangaha, ine Me·jakpa aganaha. Me·jakpani sadugiparangoni aganskaaha, “An·chingara bisongni rake beng·atako draaoba namjawa, maina Kallepma·ang adasade gipin gita dakgipa ong·ja, bisongde toromo janggi tanggiparang ong·ani gimin haida D.K.-ni beng·gimin gita uarangko ja·rikpana miksongenggen. Biako chonatani cholde me·asachipakni a·bachengjaode man·chongmotjawa ine uamangde uichong·mota ine angade chanchienga. Bia ka·anio maming saloba darang panteba an·tangko chone bia ka·china agangipa dongja, mongsongbate dal·e kam ka·giparangoni, indiba ia Kallepde an·tangan officer ong·genchim ong·omangba, gisik gnange chanchie dakenga ine angade bebera·a. Skango high skulo poraimitingo bini golpoanirangko knapae angade chanchironga, maina biade pangnan jebasi aganrongja aro jeko agana kakketkosa agana. Biade bilongen mandeba nama, gipingita toromi dakmikgipaba ong·ja aro an·tangni namnikako dakjaode uko namnikgipade ong·skaja. Uni gimin angade indake chanchiatenga, da·oba an·ching bini beng·atenganiko manigija noknapna re·ode biade namnikjawakon ine angade pil·sara kenchakenga, Indiba ian jinmani chanchiaosa ong·gen”. Mamagiparangoni saksa agandapatha, “Da·o gumeni agana ong·bebea, mosa Kallepde namen chanchininggipa ong·a, bia an·tangan inditan neng·skimae janggi tanganggipa ong·a, tangka·paisako poraia gimik chu·ongae jakkalna man·pagipaba ong·ja, maina gipinosa nokkol game

poraianggipa ong·ani gimin, je gong·sa-gong·gni  
 man·akoba simsake jakkalgipasa, chingan apsan  
 rorime bikode ma·sia. Haida da·o bini biaoba  
 nangainangjai koros ka·anikode bia nangnikjaenga  
 gita chanchiatenga. An·chingara, nangjawa  
 ingipakode dakdrae an·tangtangko biljimataniara  
 gimabeanisan ong·aigen. Uni gimin uamangni  
 namnikani gitan, re·ani giminde chanchigija biani  
 gimin chanchijolaikosa anga an·tangde  
 namnikaengjokchim". Uamangni indake tale  
 aganatoara bang·an nambebeaigen indakode ine  
 agantokaha, indiba chong·mot ba·rima ong·gijagi  
 parangoni ma·detang nanggipa aganskaaha,  
 "Na·song re·angtokbo angade mikgil palnade  
 re·pajawa, dakrongako dakjaode maidake mikkang  
 pa·gena"? Ma·giparangoni saksa aganatskaaha. "Iara  
 dakrongaengani gimin dakna nangchongmotgipade  
 ong·jaba, jatni bewal ong·gijako ia chasongni  
 manderangni dakdilengani giminsa da·oara ian  
 dakna nangchongmotgipa gita nikengjok. Skango  
 chingni songsarek ong'mitingode chawari ba  
 nokkrom kangna inoara me·chikni ma·gipa aro  
 pagipa sakgnisan re·ange sing·eroangaia. Unon  
 ba·gipa-chi·giparang on·ata ong·ode somoiko tik  
 ka·enba rima salaniko dakaijok. Ua somiode mikcha-  
 ka·saagrikosa rimdrak-saldrak dakaiani gimin  
 baditaba changde rimiosa me·chikko mikcha-  
 namnikgiparangmangba kim-a-dongaia. Indake  
 baditaba chang rima-salaniko da-komangba  
 indakpile koros ong'ja, maina changsa rimeo chu  
 te·sa aro rimbagipa panteko rodilgipa mosa-boning  
 saksni sakchet mangna song<sup>a</sup>channako dakomangba  
 baditaba chango hajalbonga ba hajaldokna  
 batjawachim. Indiba da·o ia an·chingni chasongode  
 badiaba a·nalsa-chinalsani bewalko ra·baeming,

changsa bia ka·ato komibeaha inomangba hajal  
sotsku ba laksa inesa koros ka·na nangenga.  
An·tangtang gita dongpagijade ja·mano gro·jinang  
daktiptipe janggi tangna nangengjok. Chingkon  
nichengbo, da·sikario Mebitchi·ko bia ka·ataoni  
da·onaba gro chotnan man·chipjaengjok. Chingaba  
chone dakna chanchiachim indiba me·asachinin  
gari·gora dabiani gimin dakdranan nangaijok.  
Da·ode an·ching namgipa cholko man·engani·gimin  
maina an·chingara bisongni nangjawa inako dakdrae  
an·tangtangko biljimatgen. Me·aschipaknin chone  
chanchiengode an·chingba ukon dako namaigen” ine  
aganattaioara gimikan namnike bia ka·ani giminsa  
chanchirimskaaiaha, indiba sal somoikode dolgni  
maharini aro Kallepni choljokaniko donaina ine tik  
ka·e donangtokaha. Tom·ani mathotman·o mi·chi  
cha·eming noktangtangchi re·angtokaha.

Me·kagre songara Me·jakma·ang song  
ong·achim, jeonan Blockni sue on·gipa rama dongani  
gimin gisepo bol·wa·a salna re·bagipa garirang  
re·barongani gimin chonchongipa garirangde  
songonan soke re·bana man·achim. Songo aditan  
pante·me·trarang bang·ani gimin attamode  
raamarango rorame rogiarang bang·beachim aro  
sin·kari ong·ani gimin me·apa·me·chikmarangde  
wal·tim chake rotokengachim. Indakmiting somoio  
Me·jakkpama·ang nokode walangona kingkingan  
mahari·ma·drangrang biana ka·sona man·gipa  
kamrangko ka·e rotokkuengachim. Attam  
simsimangahaon kam ka·giparangba re·angtokaha  
indiba me·aparang sakgni sakgittam wal·tim chake  
rotokkuengachim. Indakmitingo bek kerengrape kni  
watbaljake, ku·chil mandal bibalbibal, dakmandako  
teng·chap teng·chap gane re·baenggipa nomilrangko  
mitmat mitmat nisotokengachim. Chel·aoni uisojae

mitamrangde, baniba roringsa Me·jakpaona re·baengakon ine golposotokengachim; indiba sepangkal·aona sokbaon pagipa uisoenba Me·jakma·ang abisasade iara, chuti ra·eming songo Krismas manina re·batokenggen ine aganaha. Abisakosan niksoeming Me·jakpa gisiko suk ong·brejaengachim, maina uni chanchisogimin gitade Kallepba demechikgipama·ang baksa re·baani ong·chim. Kallepko niksojani gimin demechiko sing·oara, biade nogipachi joljol re·angenga, angkosa knalo rimna re·angatenga ine demechikgipa·ni aganon gisiko suk ong·beaha. Wal·tim chakpagiparangoni saksa aganaha. "Me·jakpaan baburangko ja·rika ma·ate cholikal·eming bi·sa·desarangkoba mande ong·tokatengjok, chingni bi·sarangde poraioba man·gijaming katta ra·gijaming dakan baksanaba dakchaknaba man·joljae bon·chiptokaijok". Me·jakpa aganskaaha. "Baosa, chigaba me·a bi·sa saksa donggipade poraina gisik nangjaean seng·gnang jikgipa ra·eming da·ode gitchiengjok. Jikko·deko ra·na nangja inede ongja indiba uarangko dakna skangba an·tangna cholko dake ra·chengbo ine aganpaoba chingko ka·a nangeming noko·ni ong·kate katna am·aia, uni gimin chingade nigale dongskajok. Chingni kattako manigija an·tangkosa ong·nikeming da·ode jikdrangko hajira kam ka·e alduengakon, chingaba basakona nokdang·ba·ku dakgiminko dakchakdamgen. Turao done poraiata dakoara nangarangna on·atgipa tangkarangko an·senge bon·ateming bilsa bon·ahaode porikka namja insimaiani gimin dakchaknaba gisik nangsrang·jajok. Da·ode chingko togiara an·tangosa nangeming. an·tangsa gitchiskaengjok. Ma·ni·pani aganako manigipa demechik sakgnide alamala

chu·sokangtokjokchim, abitangde Shillongon kam ka·brange nongipako niskana man·engjok. Nogipara ia bilsi M.A. dakpaengachimna. chu·sokna man·genma man·jawa ambino porikka see nipajokosa uiaignok". Na·simangara indakoba demechik sakgnian an·tangtangnade choliangtokengjok aro da·o chawari man·a sienggipade pang pang officerko man·srangengjok, chingade na·simangni nokdangna namen kusi ong·chakbea ine me·aparangoni saksa aganaha. Aiao na·songba bilongatjok, maia nambata dongesa chingara nambatpagnok, bebegitaba dedrangni aro chawari demechikni cholianira bisongnasa ong·aigen, on·e-sae cha·osa cha·pana man·aigen. Uko aganoba da·o bisong on·e-sae cha·jawa inede miksongjaenga ine Me·jakma aganskaaha. Ong·bebea ong·ade uaba, mitamde chawari-demechik·dal·e kam ka·omangba ma·ko-pako aro niotang-o'biteko mande mingskaja, indiba na·simangni degiparangde indakgipa ong·tokja, maina toromo pangchake janggi tanggiparang da·nang. Da·ode pangpang Kallepko man·srangengjok, bikode sastro skina changani giminan bang·a mondolirangan seksekpilana. Indiba biaba officeo kam ka·pagipa ong·eming cholkjokjae gisep giseposa jokaiana da·nang ine sakgipin me·apa aganaha. Golpooara bang·roroiaia basakoba golpoe rotaina gita da·alde re·aignok mo Me·jakpa ine agane noktangtangchi re·angtokaha.

Pringgipino, chong·motan December jani 23 tariko mipring cha·eming Me·jakni Turachi re·angna tarimintingo pagipaba nanga korosrangko ka·bajolchina ine tangka on·aton, on·atna nangjawa chinga koros ka·baigen ine aganeming ra·gija re·angaiaha. Songoni Turaona km 35 mang chel·ani gimin, pring 7 bajimangoni re·anggenchim ong·oba



gari man·ingjani gimin 10 bajimangosa sarigipa, Misalchini nokona sokeaha. Nang·ni bochia an·chingko bisongchina rimna da·al pring re·baenga inani gimin mikode bochitangnaba song·soenba, apsan cha·na sengsotokengachim. Indakmiting chachao ua sokangahani gimin dikdiksa neng· takate mi cha·na rimon, angade pringnin cha·e re·baaha, okkrijaengjok ine Me·jakni aganana na·a mi cha·jaode chingaba na·simang songchi re·jawa ine Kallepni bal·ekani gimin jinmaan apsan cha·na re·angtokaha. Mi cha·mitingo Misalchi aganaha, "Bochi nang·kode cha·na sikgijako drae cha·china agana dakeba bijakde mamingan dongjane, cha·napjaoba cha·e nipaibojok".Na·aba ga·suatjok, bijakara tobejok aro bako cha·gen basenan changpiljaengjok, na·simangde bijak song·naba changbea, angade na·songna song·e on·ade kratcha·bea. Sarigipani bijak song·akode bababa tonikbeana, mijal attamo chingna agana dakenga. Chingni song·akode jea dakbea song·nara changade changchongmotjajokana ine Me·jakni aganon; bochi na·aba agre tol·dugajok ine agane, bochigipako bijak sae cha·china aganaha. Pillakan cha·man ringmanora bajarchi re·na ine gario gadotokaha, maina Kallep an·tangna on·gipa office·ni gariko uchi ichi re·na nanggen ine chanchie ra·baaha. Ripamchiba manitangma·ang songchi re·na am·engani gimin kusi ong·beenba bajarchi re·angpaaha. Bajarona sokangon pillak nangarangko ra·mantokahaon Misalchini nokona re·angpilenba, cha·chini ringe neng·take attamni 3 bajimango songchina re·chakatangaha. Turaoni Me·jakma·ang songona pekwatgipa ramaona km 34 aro uanoni songona km 1 mang chelani gimin songona sokangode 4:30 mangosa sokeaha. Krismas sepango Me·jakpa·ni nokona gari salbaako nike, songni

manderangoni mitamrangde Turani baburangsa  
 Me·jakpa baksa Krismocho ringe rona  
 re·batokengakon ine chanchichtokengachim,  
 maina gisepode jilani manderang re·bae indake  
 dakrongachim. Aganako man·a kra kra Me·jakpaba  
 skangode gisep gisep ringrongachim indiba nokdang-  
 ba·kuna simsakpilgija ringe·cha·e rogipade  
 ong·tajjachim. Ua ia somoirangode chu ringiani pal  
 Sastrorangkosa poraie rorongechachim, maina  
 pagipani indaka bewalrangko uienba, Me·jak  
 pangnan uni chitio pagipako chu ringjachina aro  
 toromo pangchake nokdangko aro dedrangko  
 re·dilchina aganatan baksa, na·an indake dakaiode  
 angade Kallepko songchi rimangna kratcha·gen ine  
 uiatronganiko man·e gisik pil·enba toromo janggi  
 tangpaengachim. Mitamrang Me·jakpako ong·gija  
 dake chanchisretgenchim ong·oba, mitamrangde  
 Me·jakni segipasa ong·enggen, biasa Shillongo officer  
 kam ka·enba gari man·piljokna ine  
 agentokskaengachim. Nokona sokahaon  
 Me·jakma·ang, an·tangtangni ra·bagipa bosturangko  
 nokningci ra·napangtokaha. Chawari gital  
 sokbaahani gimin Me·jakma kusi ong·bee jakkep,  
 sakkin aro pitta tarisogiminko ra·bachina  
 demechikrangko ge·etaha, bal·eke agangenchim  
 ong·ode demechikna batemangba ma·gipan Kallepko  
 namnikbatenggen ine chanchiatna manengachim.  
 Cha·chini ringmano ja·su·miksuna ine Me·jakma·ng  
 chidarechi re·angtokaha, aro uamangi au·miksuna  
 re·angmitingo songoni pante·me·trarangba  
 Me·jakma·angko grongna re·batokaha. Au·miksue  
 re·bapilon mande bang·ako nike uamang deldik  
 dakmanpilengachim, indiba uamangko grongna  
 re·bagiparangsa ine ja·m<sup>no</sup> uienba uamangko  
 rosochina agane an·tangtangde gansre-chinsrena

nokningchi napangtokaha. Gansre-chinsreman·e  
 uamangko grongna re·bagiparangko salam  
 ka·tokenba uamang baksa golpoe·a·dingenba cha·  
 chinirangko tarie on·aha. Cha ringmane didiksa  
 roenba robagiparang gimikan noktangtangchi  
 re·angpiltokaha. Manderang re·angtokanahaon mi  
 tarienba Kallepma·angko cha·dilaha aro cha·mitingo,  
 bijak·samsak tojaoba cha·chimaibojok ine Me·jakni  
 aganon tobejok da·nang, na·tok song·kagpipako  
 angade namen ga·sunikjok ine Kallep aganaha.  
 Me·jak agantaiaha, "Angade na·simangchide toa toako  
 cha·an baksanaba basena changpilgija bijak bang·e  
 song·e on·ako cha·baachim indiba da·ode minggni·  
 minggitamsan song·e on·aengjok, jeko tonikkala  
 cha·chimaibojok". Bochi nang·ni tol·a dakaba  
 bilongjok, na·songni bijakrangan tobatjok angade  
 suk ong·prete okkae cha·jok ine Misalchi aganaha.  
 Cha·man·ringmane neng·take roengmitingo songoni  
 pamongba nabaaha, maina uaba An·chenggopgre  
 songoniamchim, indiba ua songon jik kimeming  
 primary skulo skigipani kamkoba ka·engachim.  
 Pamong Kallepni gimin namen ma·siani gimin  
 an·tangni skina nangenggipa 25 salni giljani palko  
 Kallepna on·skana inesa re·baaha. Pamong aganaha,  
 "Mosa na·a angni palko 25 salni giljao ra·skabone,  
 chingade pangnan aganrongani gimin manderang  
 knana aratpilenggnok; na·simang chel·ao dongan  
 baksaba Shillongosa dongani gimin chingna batede  
 apale uibata aro chingade skie ra·ani pal skiraraesa  
 on·a nangani gimin mamingan gisiko bariani dongja,  
 songadamni obostakode na·aba skangon uiman·jok".  
 Angaba apsanaiaba, maming uibatanide dongja,  
 indiba na·a palko on·engani gimin jechaknade sikja,  
 indiba dongiminkode an·tangtangan  
 chu·sokataibojokda ine Kallep aganaha. Ong·ja mosa

na·an ianpakde chingni giljao skie donangaibojok, chingade pangnan skirongenga ine pamongni aganon, ong·aigenba ine palko ra·rikaha. Pamong aro Kallepma·angni golpoe roanirangko knatime Me·jakpaba kusi ong·beengachiim aro cha tarie ra·bachina gita dedrangko aganaton, minil rita, kek, sakkin aro pittarangko ra·baaha. Cha ringatchina gita aganon, ringna skang pamong Isolko mitelchengenba cha ringmano dikdiksa roenba noktangchi re·angaha.

Me·kagre songara songadam ong·genchim oba kristian nokdangde bang·achim, maina ua somoiode primary skul dongahani gimin songtango poraina cholko man·enba primary matchote Turachi poraigipa rang bang'kalan baksana matric pass ka·giparangba adita sakrangde dongengahachim. December 24 pring ong·ahaon nokantini pura su·ani gam·arangan dipdap dipdap ine gam·pilengachim, Me·jakma·angba apsan daken pittarang tarina ine purarangko su·engon, skia man·gipa aro dal·dalgipa manderangni pura su·ako nike songni nomilrangde kratcha·skaengachim, maina uamangde Turao donge poraia dakgipa rangde kam ka·na~~de~~ kratcha·a daktokbeengachim. Uamangni indake kam ka·anirangko nike songni me·chikmarangba aiao inamanengachim, maina bisongni bi·sarangde alamala poraia dakgiparangde kam ka·nan arattokaiachim. Manderangni dingtang dingtang kamrangko ka·e jakchakjaengmitingo Kallepde 25 tarikni giljana ong·kat ong·degija tariengachim. Attam salniangahaon kamrang matchottokeming pante-me·trarang ramarango rorame rotokengachim aro nokantini geetrangon nitoatna tarigiminrang jipjang jipjang balwani balanina mojingjangtokengachim. Man·e cha·kalgiparangni nokrangode bijolichi ching·atgipa nitoatani aro ching·chetatani

bulbrangko tariani gimin ching·chet ching·chet  
teng·tokengachim. Indakmitingon saniba saniba  
nokrangode attamni gilja jokmane rona re·bagiparang  
dongachim. Me·jakmaang nokonaba uamangko  
grongkugijagipa manderang aro gronggiminrangba  
rona re·batokahaon, tarigimin cha·anirang aro  
charangko man·derangna ra·bae on·engachim. Cha·e-  
ringe aro golpoe roani ja·mano an·tangtang nokchi  
ropachina ine Me·jakma·angkoba rimangtokaha.  
Noksa-nokgni roani ja·mano waljatchini gilja somoi  
ong·ahani gimin nokona re·bae tarienba giljachi  
re·angon manderang aditan bang·soenba gitrang  
ring·e rotokengachim. Gnigipa kontako dokaton  
ka·diligipa biapko ra·enba giljako a·bachengataha aro  
uiatanina somoiko on·on Kallepma·angko  
rimchaksoani kattarangko pamongchi aganangaha.  
Pillak kamrang<sup>ma</sup>chotman·o skigipa adita somoiko ra·e  
skienba gilja jokahaon, a·gital menderangko  
nikeming Kallep<sup>ma</sup>a·angko salam ka·tokaha aro  
noktangtangchi re·angtokaha.

December 25 pringo, pringnian me·aparang  
bijak song·na gilja noksamona re·batokenba  
song·tok-chanchokaha aro me·chikmarang  
bijakrangko sromtokaha. Kamrang matchotmano  
manderang giljachi re·batokaha aro Kallepba  
an·tangna on·gimin pal·ko chu·sokatna ine Me·jak,  
nogipa, aro Misalchima·ang ma·ningsako rime giljachi  
re·angaha, Maniani sal ong·an baksanaba da·alde  
Kallep skina am·engana ine knae re·baronggijagipa  
manderangba re·bae, ua salode gilja nok chakjapile  
a·palrango asongtokpilaha. Gnigipa kontako dokaton  
pamong biapko ra·enba tom·aniko a·bachengaha aro  
pillak kamrang matchotmano skigipana somoi on·a  
skang Ripamchi aro Me·jak nogipama·angna git  
ring·na somoiko on·on, knatobee ring·ahani gimin

manderang gisik nangprete ku·angpile  
 knatimtokaha aro ring·a matchoto mitelpilna aro  
 Isolna rasongko on·a ine jakpa doktokaha. Uamangni  
 git ring·mano Kallep jol jol baipko ra·enba. "Jisu  
 Kristoni a·gilsako atchianiara an·chingna mai  
 namgniko ra·baa" ingipao pangchake skienba, bang·a  
 toe skianirangko agane skion bang·an gisik nangbee  
 knatimtokaha, aro skimitingo  
 tusidmuronggiparamgmangba ua salode gisik  
 nangen knatimtokenba, bang·an Jisu·ko,  
 an·tangtangko jokatgipa aro Gitel ine  
 ka·tongtangtango ra·chakna nanga inede ua salosa  
 ma·sichengeming mitamrangde jajaaha aro  
 mitamrangara Kristoko ra·chaktokaha. Kallepni  
 skina skangde uamangni bebera·anirangara ambino  
 simano sa janggi jokama jokjawa ukode ma·sigen,  
 maina mande tangmitingo name janggi tangode ua  
 jokatako man·gen indiba a·gilsako tangmitingo  
 namgija dake siangode norokchi galonako man·gen  
 inesa uamangde ma·siengachim. Indiba ua sal dipet  
 uamangni bebera·ani dingtangna a·bachengaha aro  
 mondolina on·a gilanioba ua sal dipet gisik nange  
 on·giparang bang·batahani gimin pillak Isolni  
 kamrangna tangka·paisa nanganirangoba altubate  
 man·rongaha. Kallepni skiani gimik kontasa ata  
 ong·pilomangba manderang gisik nangean  
 knatimtokaiaha. Gilja jokmaneba uigijarangko  
 sing·rikna ine chanchitokaha indiba gilja jokani  
 joljolan jinma mi cha·na nangani gimin mi·chi  
 cha·manesa Me·jakma·ang nokchide  
 re·angtokskaaha. Nokona sokangon adita neng·takani  
 ja·mano, sa·rao asongdulenba, uigijako  
 sing·giparangna agantalate on·enba ma·derangko  
 ma·siataha aro Isolni Kattarangko chanchijrianganio,  
 bi·anio aro bebera·gipaskarang baksa da·ogita

chanchirime roanio pangnan dakrongna gualna nangja ineba ua ku·pattianirangko on·e an·tangni agananirangko matchotataha.

Isolni Kattarangko agangrike roani ja·mano a·gilsakni gita janggi tanganio maika·e tikkelode aro sao pangchake dakgenchim ong·ode janggi tanganio chu·sokaniko man·a, uani giminba chadamberangna adita agane on·anirangkoba dakangaha, maina salgipinode uamang atchiram song, An·chenggopgre songchina re·angna am·engahani gimin iarangko agane rona man·jawaha ine ua uiachim. Uni indake agananiko man·e bang·a chadamberangan an·tangtangni miksonganiko Kallepni ku·pattigimin gita dakna chanchie donaha aro indaken ja·mano mitamrangde janggi tanganio chu·sokaniko man·aba man·aha. Kallepma·ang salgipino songtangchi re·angaha aro uamangni re·angmano, December jani 27 tariko bia ka·na somoi tik ka·na re·ani gimin chanchina ine sadu·jikchol, mosa·boning aro mahari·ma·chatchi gimikko okamattokahaon pillakan sokbatokenba dingtang dingtang kamrangna, dingtang manderangko donan baksana choljokgrika somoiko tik ka·e ra·echengchina Me·jakpa baksana mamatangrangoni sakgniko donaha. Salgipino Me·jakpa an·tangni mosa·boningrangko rime re·angaha, maina ua somoio Kallepma·angkoba Ma·jonggipama·ang nokoan dongsogen ine uamang uiachim. Mamagipama·ang re·bana am·enga ine uienba Kallep pajonggipama·angba nangchongmotgipa maharirangko okamate nichaksoengmitigon Me·jakpagipamangba sakgitam sokangahaon, asongchina ine am·pok·mora on·soaha. Adita neng·takani ja·mano cha·chini ra·bae on·enba, ringtok·cha·tokani ja·mano Me·jakpa an·tangtangni

miksonge re·anganiko a·bachengataha, "Pajonggipa,  
 chingade Kallep-ko bia ka·ani tarikni giminsa  
 na·simangni choljoka somoiko tik ka·grikenba  
 certificate ra·e on·a ine re·baengachim ine aganon,  
 na·simang dake-rike on·akgiparang choljokode aro  
 nokgipa Kallepara basako jokgen uarangko  
 chanchigrike tik ka·chimaiboda, chingade chuti ra·na  
 man·jawa inani kattaba dongja game  
 cha·pagiparangde indiba wanggipama; angara jokama  
 jokjawa aganatchimbo ine pajonggipani aganaton,  
 kalendaroniko nienba choljoksusû dake nikgipa  
 February jani 13 tarikan namaigen ine tik ka·e  
 donaha. Chanchirima matchotman·o, mamatang  
 sokbaa ma·ate do·o bipa rasote songahani gimin  
 mirangko tarienba chachina aganaha. Mi cha·na  
 re·angmitingo Kallep ma·jonggipa aganaha,  
 "Na·simangni re·baade magnasa maiko  
 cha·angdilgen, nang·ni nodrangni kangalkoara  
 na·aba ma·sia; cha·angna maming dongjaoba  
 mandekode man·angskaengjokba. Kusi ong·e  
 cha·angtokaibojok bijak-samjak dongjaoba". Na·aba  
 nogipaba jawako gitasa tol·a dakama, bijak-samjak  
 dongjaoba chingara noktangni manderarasaba ine  
 Me·jakpa aganskaaha. Mi cha·mitingo Me·jakpani  
 mosa-boningrangoni saksa aganaha, "Bijak dongja  
 ina dakara do·o dal·ako rasote song·emingsa nang·ni  
 nodrangde agana dakjokai, bijak song·aba tobejok  
 angade suk ong·en cha·engjok". Me·jakpa aganaha,  
 "Aiao jong na·aba tol·paboda, banisa topagnok  
 song·broke on·aiara, indiba tojaoba cha·napode  
 cha·chimbo oe". Uamangni cha·mano, songtangni  
 sadu-jikcholrangkoba cha·china ine Kallep  
 pajonggipa rimdilange an·tangba cha·jolaha.  
 Cha·man-ringmano adita golpoe roenba pajonggipa  
 aganaha, "Boninggipa na·simangara chingni mijao



agangimin gita dal·e-ro·e daknabe, gari-goraba watatna nangjawa chinga ia seng·sotgita re·sotangaigen. Chingani nangchongmotgipa maharirangba ianona tom·baesa ia gita re·angna am·enga. Na·simang dal·e dakode chingaba dal·na nanggen, indiba na·simang chone chanchiosa chingaba chona man·gen". Chon-e dakaigen inanan batgen, maichimancha dal·ede dakpana, indiba chu·sokatnara nanga inesa chingaba dakaengjok ine Me·jakpa aganaha. Golporang matchotmanahaon, ma·drangni namgipa miksonganirangna aro pillak mande ra·e dakanirangna Me·jakpa aro un baksa re·bagiparang mitele songtangchi re·angpilaha. Uamangni re·angna skang Kallepni pajonggipa dal·batgipa aganataha. "Na·simang ambino chingnade bang·dugae tarisona nangjawa, maina nangchongmotgipa manderangkosan rimangaigen, aro sak 20- nade badee chinga re·angjawa. An·ching an·tangtangan chonate a·bachengjaode sani dakmesokanichi ia biako chonatna man·gen. Bia ka·aniode dal·e dakoba matnanga, chone dakoba matnanganikode man·aia. Matnanganiko man·oba, chone dakenba matnangako man·ode an·chingnan namgni, maina an·chingnan tangka bon·gni-oniko champenga. Uni gimin man·a dipetde chonean dakna jotton ka·bo, Kallep an·tangba indake dakakon nangnikenga". Golporang matchotmano salniangengahani gimin Me·jakpama·ang songtangchi re·angaiaha.

Kallepma·angni songtangona rona re·baa inaniko knae mahari-ma·drangrang aro ripengskarang uamangko grongna re·bagiparang bang·beaha. Uamangni songo dongmitingo pajonggipama·ang nokode mi pattignimangsang cha·na nangaiaha, maina maharirang aro

ripengskarangni okamatachi re·ange cha·na nangraongaiachim. Kallepma·ang songo antisa ong·na am·pile roangaha, aro bilsu gital manianioba songtangan dongangaha. Bilsu gitalko maniano December 31 attamni waljatchi gilja Kallepko skina donahani gimin somoi sokahao skina nanggen ine Kallepde Sastro nibeengachim, indiba ripengskarang rona re·baani giminan namede nina man·jaengachim. December 31 ni waljatchi giljaode Kallep skina am·enga inani gimin manderang bang·an ua somoio gilja re·na ine ku·monge dontokengachim. Bean bebe somoi sokahaora gnigipa kontako dokna skangan gilja mande bang·ahani gimin a·palrangosa asongpilengachim. Skina somoi on·on, Kallep bang·a Sastroni Kattarangko aganan baksa toe skianirango aganaha. Bon·kamao an·tangara maikai Kristoko man·aha, janggi tanganio maidakgipa dukrangko man·ahachim aro sao pangchiake janggi tanganichi indakgipa gadangona sokdoaha iarang pillakko aganenba manderango bilongen gisik nangatbeaha aro mitamrangde gilja nokningon grapna nangpilaha. Mitamrangde ua sal dipetsa Isolko ma·sienba an·tangni Jokatgipa aro Gitel ine ra·chakaha. Gilja jokmano Kallepma·ngchi rona skoba tusina nanggnok ine chanchienba knalo na·songchi rogen ine agangatgiparangan bang·beaha. Gilja jokmane noktangtangchi re·amgmitingo mitamrangde Misalchini giminba golpoe aiao inmantokengachim, maina uara skango songo dongmitingode segipa ra·eming galgrike ma·gipa sagi baksa kam ka·esa cha·aiachim, indiba da·ode Turao dal·batgipa skigipa ong·engaha ine uamang uiachim. Uamangni indakgipa gadangona sokdoaniara Kallepni a·selsa aro minggipinara uamang Isolko ma·sie janggi tangani a·selo Nokgipani pattianiko man·skaenga·ha

ineba mitamrang aganskaengachim. Pring seng·ahaon me·aparang gilja nokni sa·raona bijak song·na re·batokaha aro song·man·chanmano giljana skang cha·e·ringenba, giljana tarie ra·bana ine noktangtangchi re·angtokaha. Salni giljao skina gita Misalchikoba donsoahani gimin uaba tarie re·angaha aro skina somoi on·ahaon, an·tangni janggitanganio maini a·sel dingtanganiko man·aha aro maidakgipa dukrangko chakahachim uarangko aganangon mitamrangde mikchi rakjae a·palchi ong·katange mikchi ipakpilaha. Misalchini skianirangba inditan ga·suahani giminan pillakan gisik nange knatimtokaha. Gilja jokmane Kallepma·ang baksa golpoe rona sikiparangde giljaoni jaljolan ra·baenba toromo aro songsalo janggi tanganio maika·e janggi tangode Isolni pattianiko man·a uarangko chadamberangna ku·pattie donangaha. Songo roangkuna sikanirang dongkuomangba 2 tarikonin office dongahani gimin Kallep songtangoni nodrangko rime Shillongchi re·na skang Misalchini ba·rarangko ra·chengna ine Turachi re·angchengaha aro 3 tariko pringni an·tangni garion Shillongchina re·angtokaha.

### **BAK- 7 :**

#### **KALLEPKO BIA KA·ANI ARO UNI NOKDANG- BA·KU DAKANI ::**

Balisi a·bachengengahani gimin biani ja sepangbaengahachim, maina Me·jakma·angni biako gital bilsini February jani 13 tarikkon tik ka·aha. Badita biana sepangbaroroa inditan Me·jakma·ang nokode kamrang bang·baroroengachim aro kam ka·giparangba adita pante-me·rrarangde salantian

bang·eng·ahani gimin jikjak jikjak dakengahachim.  
 Me·gagre songara indita song jelgipade ong·ja, haida  
 nokking 25 mangde ong·ani gimin songgimiko  
 mende sak 250 mangsan dongaiachim. Biako  
 chonesan dakna agangenchimomangba songtangni  
 manderang baksana me·asani ma·drang aro gipin  
 gipin songrangoni re·bagiparangna chanchie gimik  
 sak 350 mangnade chanchisoe korosrangko kagen  
 ine Mejakpa hisapsamsoe donaha aro indaken wak  
 dalako mangsa, matchu chara milako mangsa aro  
 doo mang 20- kosan biani salnade breaha indiba  
 kam kasogiparangnade mirangkode songgija cha  
 baksana cha·anirangkosan on·enba biani  
 korosrangde aditan komebeengachim. February ja  
 ga·dapahaon biana tarisoanirang  
 matchotangengahachim, indiba song·chak-  
 chanchakanirang chu·ongkujwa ine nike nokantini  
 karahirangko chimongan baksa rikgimin basarangna  
 kosakrango bolbijakrangko pindapna  
 nangkuengachim. Sal sepangbaahaon dakna nanga  
 kamrang matchotmantokaha aro hadiabako koros  
 ka·changanirang dongama dongja ine sandion  
 nikjahani gimin ong·aignokkon ine chanchie  
 donchengaiaha.

Biao gane ka·ani gimin maidakgipa gananiko  
 gan-na am·enga ine ripengskarangni sing·on Me·jak  
 aganaha, "Angade A·chik ma·ate dakmandako blouse  
 baksa gananikon namnikbateming, Turao dokatenba  
 ra·baaijok, uaba bewalde dam ong·aijok maina gana,  
 chuni aro chola chit·ko dokatahajokana gimikchi  
 hajalsa ritchabonga ong·aijok". Ua somoini 1500- ko  
 da·ona chanatode haida 3000-mangde ong·genchim  
 ine chanchiatna man·gen, uarangna agane gipinko  
 dake korosko galjaha, maina indakgipa bewalrangko  
 Kallep an·tangan namnikja, uni nikanio iarangba

nanggijarangna koros ong·giparang ine ua  
 ma·siachim. February jani 12 tarik sokahaon  
 mamatangrangoni saksa aro pagiprangoni saksa  
 me·asani maharirangko rimna re·angaha.  
 Re·angendon re·sotgipa gita re·ode km 1 mangsan  
 chel·aiani gimin ua gitan re·angaha aro maharikoba  
 ua gitan rimbagen ine tik ka·e donaha, maina  
 me·asani maharirangni namnikaniba indaken  
 ong·achim. Uamangni songona sokangon Kallep  
 pajonggipama·ang nokoba aditan manderang  
 bang·aha maina uamangba re·pana nanggijagiparang  
 cha·china ine wak doke aalengachim. Maina  
 uamangni miksonganiara biachinade  
 nangchongmotgipa manderangkosa·n rimaigen ine  
 tik ka·manahachim. Uamangni miksongani gita  
 batbeoba sak 20 ba 22 mangkosan Kallepni biachina  
 rimna gita tik ka·aha. Uni giminsa biachi re·pana  
 man·gijagiparangba cha·pachina ine  
 pajonggipamangna Kallep an·tangan wak mangsa  
 on·aha. Uamangni cha·mitingo me·asani  
 maharirangko rimna re·anggiparangba sokangahani  
 gimin cha·chini on·soenba dikdiksa neng·take mi  
 cha·china on·aha. Pillakan cha·man·ringmanahaora  
 noktantangchi re·angaha, indiba  
 nangchongmotgipa maharirangde  
 dongrikkuengachim. Mahariko rimna re·bagiparang  
 mi cha·manahaon uamang baksa golpoe rotokaha.  
 Golppoe roengmitingo rimna re·bagiparangoni  
 aganaha, "Chingade na·simangkode knalde sasti on·a  
 gita dakaignok, maina gari·gora ingipakode chingade  
 ra·bajajok, na·simangni beng·an baksana Kallepba  
 beng·atana. Na·simangni agana gitan ramara  
 re·sotgipa gita re·ode sepangaia ine chingaba iakon  
 re·sotbaijok. Gari ra·oba bawilpilaia aro dal·gipa  
 garirangde re·naba kenanidonga, maina ramarangba

apchona, uni gimin chingaba na·simangni beng·atakoba pa·sikjolaijok an·tangtanga koros amjoljae. Jeba ong·bo salsakode chakchikeba chu·sokatna re·patokaibojok". Me·sani mamatang dal·gipa aganatskaaha, "Ian namjok, maina gari·gora, chengo·minnede gario re·eming janggi tangama chingade skango pante dal·drobamitingo anti·bajar cha·na ine Turachi apa sagima·angko ja·rikmitingode, salburi salbonga re·ang re·pil ja·achi re·bajok, da·o km 1 mangmangko re·nara mai neng·ani. An·chingara bia ka·e aalenga inamisikna nangai nangjai koros ka·e bon·atana batede, badiarangko nangbrejachim uarangko galroroe man·a dipet koros komeao chu·sokatna man·ode nambata aro iarangni gimin chanchien chingaba an·tangtangni gita chanchie komebata koroso chu·sokatanikon dakpaengachim". Iarangni giminde chingade maiko aganpagen, indiba na·simangni gisik gnange dakanina mitelana agre, aro gipinrangba namgnike nikode apsanko ja·rikange an·tangtangna namgniko ra·china ine re·bagiparangoni aganaha. Golpoe·agane roon somoirang re·angahani gimin pillakan noktangtangchi re·angaha aro tusichina ine sokbagiparangnaba biaprangko tarie on·enba an·tang tangba tusitokaha.

Pring seng·ahaon biachi re·na dongimin maharirang sokbatokaha maina songoni re·chakanta gita pringni 7:30 bajiko donenba jilmako sengachide 8 bajirang ong·angaiahachim. Bia ka·na dongimin somoiara pringni 10 bajikon donahani gimin, km 1 kosan re·genchim ong·omangba jinma ong·ani gimin aro bosturangko de·giparangba dongani gimin konta sade nangtelaigen ine uamang uiani gimin 8:30 bajionide re·angaha. Regipa gimikko chane nion gimik sak 21 gapahani gimin chu·ongaiaha ine

re·chakattokaha. Jansalo uamang sokangaha geeto dongsogipa nomilrang sokanggipa maharirangna pulrangko patsoaha aro me·asani maharirangko biani pandal ona rimangchengenba charangko on·chenge, giljanokchi bia ka·na ine rimangchengaha. Giljaona nanggiparang sokangtokahaon Kallep aro Me·jak gilja nok mikkangoni jakritinge napangaha aro uamangni ja·ma-n ja·man me·asani aro me·chikni ma·gipa-pagiparang re·angaha. Uamangni napangmitingo giljao asongsogiparang uamangko mande ra·aniko mesokna chadengsotokaha aro uamangni sokangahaon asongtokaha. Bia ka·ani giljaona re·anggiparang gilja nokode aditan gapaha maina gilja nokan sak 150- mangkosan chakaiachim. Nanggiparang soktokahaon pamong bia ka·anio git ring·ata, ku·mikchetata, ku·patia aro bi·chakanikoson dakna nangaiaha maina ring patani aro cake ratanirangko Kallep an·tangan namnikjani gimin program-o donsojaha. Kallepni chanchianio iarangba nanggiparangko dakdape koros ong·atenggipa ine uiachim. Bia ka·mano Me·jakpa, giljaona re·anggipa pillakkon an·tangni nokona re·angchina aganataha. Songadamni manderang ma·ate bia ka·anirangna kam ka·anirangoba namen gisik nange kam ka·tokani gimin pringni 10 bajimangon song·man-chanmane, kam ka·giparangba matchottokahani gimin, cha·chini aro mi·chi gimikkon bia ka·ani matchotna skangan tarisotokaha Manderang sokangahaon cha·chinirangko on·chengenba, me·asani maharirangko mi cha·na rimangchengaha. Uamangni cha·mano gipin sokbagiparangna, pamong aro giljani dilgiparangna me·asani maharirangna tarisogipa cha·chakramo on·engmitingo songni kam ka·giparangna aro bi·sa-desarangnaba jinamana on·a

rikgipa pandalo on·skaaha. Mi·chi on·anio me·asani maharina dintang aro gipinrangna dintang dake tarianikode Kallepan namnikjani gimin ge·gni pandalon apsan rokkomni bijakrangna agre dingtanganirang dongjachim. Kallep an·tangan diangtang diangtang biaprangchi re·e bia cha·e nikenba bang·a suk ong·gijanirangko man·ahani gimin indakgipa bewalko namnikjae an·tangko bia ka·anion a·bachenggen inenba a·bachengataha. Uni indakgipa kamko a·bachenganina songni manderangba kusi ong·beaha, maina mitam mitam biarangode song·gipa changipa aro kam ka·giparangde komea bijakrangko aro mi namgijarangko cha·manrongaiachim, indiba me·asani ma·drang aro okamako man·e re·bagiparangde nambata aro dintangbata bijakrangkosa cha·rongachim. Indiba Kallepni biani salode darangan apsan mibijakrangkon cha·na man·eming sokachakgiparangko darangba matnangani kattako agananirang dongjaha. Biaona sokbagipa manderangba bang·jani gimin cha·a·ringanirangko tari·sachianirangoba namen dakna man·aha ine songni manderang aganaha. Ia pillak kamrango name chu·sokanirangara Kallepni mikasale kam ka·an baksa uni jikgipa, nogipa aro un baksa ka·rimskarangni, uamangni biana Nokgipao bi·soahani giminba ong·aha ine nikatna man·gen. Bia ka·ani ja·mano Kallep aro Me·jak antigittam·mangde songo roangaha. Songo romitingoba ua an·tangko darangnaba officer ine mesokna sikjaha, batesa pillak gadangni manderang baksa golpoe·agane rorimaiachim. Ua toromna inditan gisik nanggipa ong·ani gimin, bia ka·ani salgnini ja·manonin nokdangni bi·aniko a·bachengdilaha. Mamagipa, Me·jakpaba chawarini indake



dakdilaniko namen kusi ong·nikbeaha, maina uaba da·ode salantin Sastro poraie aro bi·e janggi tangia-engahachim. Me·jakpara skangode ripengskarango noktangona okamate botol songkame ringdilaigipasachim, indiba bi·sa desako poraitna aro nokdang·ba·ku dakanio gisik nanggipa ong·ani gimin gisik nange poraigiparangde chu·sokna man·aha. Jensalo Kallepko man·baha ua sal intal Me·japkama·angni nokdang nambataha aro kusi ong·begipa nokdangba ong·baaha. Nokdangni dedrangni giseponi saksakam·kam depante Ka·grak·de ma·ni·pani agananiko manijaeming seng·ngang jikgipa ra·enba, maming chol·ap dongjaeming pagipani alduako cha·dile jikgipako dongdilaengahachim. Pantemitingo skatang dakgipa ong·oba, da·o Kallep uamangni nokdangona re·baon Ka·grak·koba Jisuko ma·siatna man·aha aro indaken uaba an·tangni skango skatang dakanichi chu·sokna man·gijanina gisiko duk ong·beengachim indiba namatpilna gita jikgipa ra·manahani gimin uko galpile poraitainaba namjawaha ine gisiktango chanchibengachim. Uamango bi·sa·desa dongkujani gimin poraitainaba cholde ong·kuengachim indiba dakchakgnigipani giminsa neng·nikengachim. Uamangni gisiko neng·bee chanchie dongengmittingo Kallep an·tangni miksonganiko, mamagipao singchengaha. “Mama angade Ka·grakni gimin indake chanchiengachim, biade kamgri·damgri maikae janggi tanggen, da·o bi·sa·desa dongkujani giminsa na·simangba alduna man·enga ambinode neng·nikani ong·gen. Uni gimin klas 10·onade poraiahani gimin Shillongchi rimange klas 10·oan badiaba skulo poraiate matric·kode seate nina skengachim, na·simangara namnikama namnikjawa? Indiba jikgipakode na·simangoan

donangaigen, nangani somoio na·simangna kamrangko dakchakchinajok. Matricmangmang pas ka·ahaode anga jeoba chona-remako am·emangba kamna dake on·aignok", Na·simang dakchak-rikchaknakgiparang rimangode aro porainakgipa re·anggen ong·ode chingara mainasa namnikjagnok, indinba sani dakchakaniko man·gen inengachim. An·tangara re·rame-rorame kamrangko sandie ka·naba neng·roroeming aratangaengjok; uni gimin uiakoba uija dake dongaengjok ine Me·jakpa aganskaaha. Ka·grakba an·tangan poraitaina skani dong·engani gimin gumetangma·angni miksonganiko namnikbeha aro indakgipa cholrangko man·enganina Isolko gisiktango mitelengachim.

Antigittam songo roani ja·mano Kallepma·ang Shillongchi re·angna taritokaha indiba Shillongchi re·angna skang namchikgipa Ripamchiba re·na nanggen ine Turachi re·angenba, uchi salsa neng·takesa Shillongchi re·angtokaha. Kallepni bia ka·ani bilsio namchikgipa, Ripamchi B.A. finalko sena sengengachim, uni gimin ua somiode chuti ong·eming ma·gipa baksan Turao dongengachim. Kallepma·angni Shillongchi re·angani somoio uamang sakbonga re·angaha, uamangara Kallepma·ang jiksese, Do·kime Ripamchi aro Ka·grak ong·a. Do·kime ua somoio M.A.-ko poraiengani gimin klas dongengaha ine re·angaha. Da·o Kallepma·angni poraiatna nanggipa ba dakchakna nanggipade Do·kimena bilsisa aro Ka·graknasan nangengaha, maina Ripamchinade M.A. poraigenchim ong·oba ma·gipasa dakchaknasiengachim. Bean bebe somoi ong·ahaon B.A. semane result ong·ahaora Ripamchi namahani gimin ma·gipa Shillongon poraichina ine mamagipa-ma·angchinan rimange donaha. Do·o

Kallepni nokdango gimik sakbonga dongaha indiba song·tim·chantime on·a rakkigipako chanede gimik sakdok dongachim. Gtalgipa nokdangko dakgenchim ong·omangba uamang attamanti bi·anikode dakrongna gualjaha, maina uamangni pillak janggi tanganko dingtangatgipa Isolsa ong·a ine Kallep aro Me·jak uichong·motaha. Uamang nio·tang o·bitena chel·aosa dongenchim ong·omangba chu·onga gitan tangkarangko jaantian on·atrongahani gimin Me·jakpagipama·ngba maming neng·nikaniko man·jaha. Bilsi gittamni ja·mano uamang baksa donge poraienggipa gimikan matchottokenba, Do·kime aro Ka·grakma·angde officeo kam ka·pilaha indiba Misalchide poraia matchote kam am·na ine uamang baksan dongkuengachim. Ka·grakba chona·rema kamko man·paeming janggi tanganio tang·dokalaha aro jikgipakoba Shillongona rimbae an·tang baksan dongataha. Uamango bilsigni ong·gipa depanteba dongani gimin bi·sako kal·eming suk ong·tokbeaha indiba uamangde abigipama·ang baksa ong·gija dingtang nokosa dongskaaha. Bilsisani ja·mano Ripamchiba kolej ge·sao skigipani kamko man·enba dingtang noko para ra·e dongskaaha. Da·o Kallepni dakna nanga matchotaha ine ua gisiktango chanchie suk ong·beaha aro iarang pillakna Isolkoba mitelaha.

Gitalgipa nokdangko rikanio Kallepma·angni nokdangara kusian gapgipa nokdang ong·baaha, maina uamangni gisepo maming jegrikani aro mikneng·mikbugrikani dongjachim. Gisepo mainaba gisik sagrikani ong·genchimoba kema ka·grike tom·tomgipa nokdangko rikanirangko nike noksul·songsulrangan aiao inmanpilengachim. Bilsi 10 nokdangko rikani ja·mano uamangna depante saksa aro demechnik sakgniko Isol pattiaha. Dal·batgipa

depanteko Ba·rang, demechikrangko Miginde aro Mibitchi minaha. Bi·sarang bilsini kri dal·baahaon uamangko dingtang dingtang klasrango poraitaha. Bi·sa sakantian chonaonin lekka man·giparang ong·batokaha aro ma·a paako mande ra·ani, skigiparangna bamani aro dal·batgiparangko mande ra·ani giminde jenan nangjachim. Maina dedrangni janggi tanggni ramarangko chonaonin Isolna pakwatan baksa Kallep aro Me·jak an·tngtangan nama bewalo janggi tangmesoke aro agan·skie on·rongaha. Kallep uni a·bachenge janggi tanganirango aro poraimitingo bang·a neng·nkanirangko man·ahaoba, uni tikkele janggi tangan baksa an·tangko Isolna pakwate janggi tanganichi, uni ma·gipani nokdangko, niotang·o·biteni nokdangko, nokdangtang ko aro bang·a songsalni bewalrangko namgipa dingtanganiona ra·bana man·ahani gimin, uni janggi tanganirangko uigiparangde Kallepko mitelgijan ong·na man·jaha. Chonaonin dedrangko Isolna pakwatan baksa maikae janggi tangode janggi tanganio chu·sokaniko man·gen, pillakkon Kallep aro Me·jak dedrang sakantinan skie·agane on·ahani gimin sakantian janggi tanganio chu·sokaniko man·enba songsalni aro mondolini jakkaltogipa manderang ong·bakskaaha. Kallepni dedrangni janggi tanganiko nike bang·a ma·a·paarangan kusi ong·chakaha, maina uamangara detangtangko jegita doke·sate agan·skigenchim ong·mangba namatnan man·jaengachim, a·selara uamang dedrangko Isolna pakwatani gri agan·skie on·mangmangaiani a·sel ong·achim ine nikatna man·a.

“Dedrangko da·latanio uamangko mande ong·atani ba ong·atgijani chu·gimikan ma·a·paani jako ong·a, indiba ma·a·paa mamingko

uigijagiparang ong·genchimode, nokdango saoba  
Isolko ma·sigipa dongskaode, uaba apsan balko  
ra·enba nokdang gimikko dingtanganiona ra·bana  
man·a; jekae Kallep an·tangni janggi tanganichi  
bang·a dingtanganirangko uni nokdangna on·a  
man·aha”. Pangchakna bang·gija Sastroni  
bakrangkoba an·ching niatna hai toe-skianirang  
22:6-o agana, “Bi·sako uni re·na nanggni re·anio ski  
taribo; aro bilsa bang·ahaoba ua unoni ekjawa.”  
Apsan odaini pod 15-oba agana, “bi·sani ka·tongo  
gisik grianiko kachapa gnang; Indiba skiani betsmi  
t uko uaniko chel·atgen. Ia Sastroni kattarangko  
poraigipa sakantina maiba namgniko on·china angni  
ska. Amen. □

**“AN·TANNGNI MIKSONGANIRANGKO ISOLNA  
PAKWATODE, JANGGI TANGANIO  
CHUSOKANIKO MAN·CHONGMOTA”**